

SPECIMEN PANOPLIÆ SACRÆ MILITANTIS ECCLESIÆ:

Ad cunctas Hæreses debellandas,
omnesque impietates profligandas
ex ea: Asservatæ in Sanctissimorum
Fratrum Patriarcharum Cherubici
DOMINICI, ac Seraphici FRANCISCI,
locupletissimis Armamentariis
in diem Pugnæ, & Belli.

Quam probandam, in proximis
Concertationibus Academicis
ineundis, palàm in lucem
producet

P.^{TER} F.^{TER} LUCAS RAMIREZ,
Sacrae Facultatis Theologicæ Doct.



²
Archiepiscopatus Hispalensis Exa-
minator Synodalis, Sanctæ Supre-
mæ, ac Generalis Inquisitionis His-
panæ Censor, ac in Primario Almæ
Angelorum Provinciæ Hispalensi
Conventu, Deo Optimo Maximo,
in honorem Sancti ANTONII de
PADUA dicti, sacro, Regularis, ac Re-
formatæ Observantiæ Seraphici
P. N. S. FRANCISCI Presbyter indig-
nus, ac Vespertinæ Cathedræ
Moderator.

OFFERENDUM
SANCTISSIMO PATRI,
AC DOMINO NOSTRO
BENEDICTO XIV.
Pontifici Optimo Maximo.

4²

3

DICATUR

Corde magno, & animo volente,
Regio, ac Serenissimo Infanti

HENRICO STUARD

SOBIESKI,

Duci Eboracensi, Secundo-Genito
Serenissimi JACOBI Tertii; Magnæ
Britanniæ, Franciæ, & Hiberniæ
Regis, Fidei Defensoris semper in-
victi, Almæ Metropolitanæ, ac Pa-
triarchalis Ecclesiæ Hispalensis Ca-
nonico, Carmonensi Archidiacono,

Archiepiscopo Bononiensi, ac

S. R. E. Cardinali item

Eboracensi amplissimo.

AD PARABITUR

Pro venerando Theologorum con-

gressu Exhedra strata in antedicto
ANTONIANO Hispalensis Cœnobii
Templo, quo sibi conditum esse
noverint Sacræ Facultatis Reveren-
dissimi Professores, pro mense Majo,
diebus suo tempore assignandis, anni
proximi millesimi septingentesimi
quingagesimi, Sessionibus ma-
tutinis, ac pomeridianis.

Pro discutiendo, atque enucleando

P R I M ò :

Resolutiones omnes, tum Philoso-
phicas, tum Theologicas Magni
illius, ac Venerabilis ALEXANDRI
HALLENSIS, cognomine notissimo
DOCTORIS IRREFRAGABILIS, Sæculo-
rum consensu meritò insigniti, in

^s
ejus famigeratissima Summa Theologica, cæterisque Scholasticis ejus Operibus oppidò contentas.

SECUNDò:

Systema Thomisticum, omnia complectens Dogmata inconcussa, tutissimaque Angelici Doctoris D. THOMÆ AQUINATIS, latè, solidè, sapienter, ac subtiliter dispersa per omnia opera Scholastica, Philosophica, ac Theologica, ejusdem Sancti Doctoris; ad genuinam ipsius mentem, Rigidiorumque Thomistarum in Sacro Ordine Prædicatorum sensum.

TERTIò:

Ignita, flammantia, atque Ortho-
doxa

doxa Dogmata , seu Resolutiones
Scholasticas, Philosophicas, ac Theo-
logicas universas Seraphici Docto-
ris Nostri D. BONAVENTURÆ , sive
in Sententiariis tradita per Eun-
dem, sive in Opusculis infrà
laudandis.

QUARTO:

Systema Scoticum Subtile , Soli-
dum , Sublime , & Orthodoxum;
seu Assertiones omnes Philosophi-
cas, ac Theologicas Venerabilis Pa-
tris Nostri Fratris JOANNIS DUNS
SCOTI, Cognomento DOCTORIS
SUBTILIS, à Sede Apostolica laurea-
ti, luculentissimè dispersas per Ope-
ra ipsius Scholastica, infrà nominan-

da , ad sensum Rigidiorum Scotis-
tarum in Sacro Ordine
Minorum.

QUINTO:

Miram, ac minimè conjecturalem
Concordiam in omnibus, tum
Philosophicis, tum Theologicis,
Doctorem Subtilem SCOTUM inter,
Angelicumque Præceptorem

D. THOMAM AQUINATEM.

Addita concordia Utriusque cum
Magno Parente Augustino.

SEXTO:

Doctrinam universam à Venerabili,
atque Extatica Virgine, ac Ancilla
Dei, Sorore MARIA à JESU de
AGREDA, traditam in Opere mirifi-

co, cui inscribitur titulus : *Mystica
Civitas Dei Historia
Divina , & c.*

SEPTIMò tandem :

Facilem, Planam, atque Harmoni-
cam Concordiam Doctrinæ totius
proximè laudatæ sacre Virginis
Theodidactæ AGREDENSIS, ad do-
ctrinam SS. PP. Ecclesiæque DD.
& potissimè ad eam, quam in Ope-
ribus suis tradit suprà laudatus

Doctor ANGELICUS DIVUS

THOMAS AQUINAS.

*Arma militiæ nostræ non car-
nalia sunt. 2. ad Corinth.*

cap. 10. v. 4.

5
9
EPISTOLA NUNCUPATORIA.

HENRICO
STUARD SOBIESKI,
DUCI EBORACENSI
Celsissimo, &c. &c. &c.

F.^{TER} LUCAS RAMIREZ
Utramque sospitatem adprecatur,
& omnia fausta.



INVITO heterodoxo, venali, perfido, ac rebeli Britannico Senatu, omnis justitiæ, ac pietatis inimico, pientissimæ proinde, atque

Augustę Domui Stuardorum iniquissimè ad Parricidium, quinimò & (horresco referens flagitium inauditum) ad Regicidium usque infesto; Specimen hoc Sacrę Panoplię Militantis Ecclesię, Summo Pontifici donandum, Celsitudini Tuę, (PRINCEPS SERENISSIME, EMINENTISSIME DOMINE) alacri prorsus, ac libente penitus animo devovemus. Munusculum planè exiguum, nec tanto Principe dignum reputaverit quisquis cum offerentis tenuitate oblatum contulerit; tametsi ex cæteris adjunctis, ex objecto præcipuè, contemptibile non adeò esse deprehenderit fortassè rerum æquus Æstimator. Verùm cesserit utcumque res, id certum habere ausim; Tibi, Glorię Magnorum Avorum tuorum Succrescenti oblatum, magnum esse futurum; respiciente Te illa, qua assolēs, Clientum tuorum vota, serena fronte, majus; Te, demum, attollente ad fastigium Sedis Apostolicę, in Arce Sacratissimę Religionis constitutę, Summo, Sanctissimo, ac sinè assentatione, Doctissimo Militantis Ecclesię Duci, ac Doctori porrigente, omnino maximum evasurum.

Atque equidem istius PANOPLIÆ SPECIMEN, justissimis de causis, per manus Celsitudinis Tuę, Summo, ac Pientissimo Pontifici

pro-

promovendum erat. Ut enim de monumentis innumeris Regiæ Progenitorum tuorum munificentiae, largiter impensæ Ordini utrique Clarissimo PRÆDICATORUM, ac MINORUM, quorum præsens communis est causa, pro nunc fileamus; immorari nolentes in re notissima, quam Annales utrorumque luculentissimè protestantur: Nil, ausim affirmare, istius sub Opellæ titulo exponitur, quod vel ex Anglia illa tua, quondam felici dum orthodoxa, traductum non sit; aut eandem summoperè non concernat, afficiatve. Ac reverà, eorum, qui Sacram Theologiam post Magistrum Sententiarum scholastica methodo tradiderunt, præeminet, inter primos Ævi sui Theologos, Magnus ille ALEXANDER HALLENSIS Anglus. Parum est: à præcedentium sæculorum Scholasticis universis palmam tulit, sequentium sæculorum Scholæ Antesignanis præfulsit copiâ, subtilitate, methodo, ac soliditate perspicua: quæ omnia, tum Summam ejus Theologicam, tum alia, quæ post se scripta sua reliquit, legentibus liquidò probantur. Idem ipse est Franciscani Lycæi Protoparens Illustris, Laureatus primus, ac sæculorum consensu cognominatus IRREFRAGABILIS DOCTOR; ipse Sanctissimorum Fratrum D. THOMÆ AQUINATIS Doctoris Angelici, ac Seraphici Doctoris

D. BONAVENTURÆ Præceptor Inelytus, ac
Præclarus.

Doctorem suum, ac Præceptorem Hallensem
tempore proximus subsequitur Angelicus Dr.
D. THOMAS. Ut Phosphoro splendenti succedit
Sol mirabiliter illuminans, ita D. Thomas suc-
cedit ALEXANDRO: quem, quò jus Celsitudinis
Tuæ in Ipsum firmaretur amplius, virtutibus
imbuendum, ac literis erudiendum in Ædibus
Paternis Illustrissimis, jam pridem præripuerat
sibi Vir apprimè celebris THOMAS HIBERNICUS,
Ordinis Prædicatorum. De laudibus, encomiis-
que hujus Sanctissimi Doctoris, planè satius esset
omnino filere, quàm pauca congerere. Sed pro-
lixa laudatio est, quæ non quæritur, sed tene-
tur in ipsomet ejus Nomine, quod interpretatur
ABYSSUS. Abyssus, inquam, enim verò castissimæ,
sublimis, orthodoxæ doctrinæ, ac sanctitatis
est Angelicus Doctor, totius Ecclesiæ Dei com-
mune Propugnaculum, ac Præsidium inexpug-
nabile. Tibi etiam, Princeps Clarissime, deberi
Doctorem SERAPHICUM, quem nec laudibus nos-
tris, nec votis æquare possumus, probat supra-
dicti Venerabilis Senis HALLENSIS Magisterium;
nec omittendum, quòd ad Antiquissimæ, ac Ce-
leberrimæ Metropolitanæ Urbis Tuæ Eboracensis
Ecclesiam olim electus fuerit Archiepis-

copus; tametsi præ humilitate, qua pollebat eximia, insigne munus recusaverit. Doctorem porro Subtilem quod attinet, res in confesso est. Is enim sub Dominatu Progenitorum tuorum Magnæ Britanniae, ac Hiberniae Regum procreatus, vitæ hujus, ac lucis usuram capessivit. De ortu tanti Doctoris inter sese meritò digladiantur Anglia, Scotia Major, ac Minor, diuque disputent per me: utcumque tamen de lite ista invidenda transactum fuerit, decisumve; SCOTUS, nedum ut Cliens, verumetiam ut Indigena, Subditus, ac Vassallus, ad oscula manuum Serenissimi Ducis Eboracensis, Domini sui Clementissimi, recipiendus erit.

De Extatica autem, ac Sacra Virgine MARIA A JESU DE AGREDA quid? Hæc, (*) *quoniam non cognovit literaturam, introivit in potentias Domini; atque (*) introducta in Cellam Vinariam, Sponsus ordinavit in ea Charitatem.* Hinc crebris gemitibus, atque irremediabilibus lachrymis deflere solita, nedum iniquorum omnium cæcitatem, sub servitute dura impietatis suæ mancipatorum; verum & præcipuè, Nationum Borealium à Piæ Matris Ecclesiæ Gremio defectionem; Anglicanæ præsertim Gentis tuæ sortem acerbam, deplorabilem.

(*) Cant. 2. v. 4. (*) Psal. 70. v. 15.

lemque; quæ, excusso suavissimo Christi Jugo, discissa diro Schismate Ecclesiasticæ unitatis charitate, unius ob noxam, & furias infelicissimi Regis, in pestilentissimarum hæreseon voraginem prolapsa est. Hujus ergo verè sublimis, eximiaeque Scriptricis, vel potius Cherubicæ, ac Seraphicæ Doctrinis Opera, Summo, ac Doctissimo Pontifici offerenda, summorum cum Theologorum Operibus meritò sociata sunt; ob omnimodam eorundem operum præstantiam, ob eorum cum Sacra Veteris, ac Novi Testamenti Pagina consonantiam, in quibus nec latum unguem Theodidacta Virgo discedit à Sacris Ecclesiæ Catholicæ traditionibus, à Sanctorum Patrum sensu, præcipuorumque Scholæ Doctorum. Hæc omnia, Deo Optimo Maximo concedente, suo tempore patefaciemus: ostensuri præterea, Angelum eidem Sacræ Virgini dictare solitum, etsi nonnullibi Scotista videatur; nullibi tamen non fuisse, & esse Thomistam.

Hæc obiter dicta sint, Serenissime, atque Eminentissime Insulate, in sciolos illos temerarios, ac factiosos, qui Parisiis, sub eminenti larvâ Sacræ Facultatis Sorbonicæ omni laude dignissimæ, fas omne abrumpentes anno MDCXCVI. freti quorundam Potentum impiorum hominum patrocínio, Theologicam inurere censuram

ram ausi sunt Primo Tomo Operum istorum, de proprio, ac nativo Idiomate Hispano in alienum, & exoticum oscitanter forsan, saltē non apprimē converso. Totius rei gestę seriem, rationemque pandit in conspectu Solis, Pręfatio illa, quam Parisiis Matritum mittendum curavere Viri Pii, doctique, quī testes interfuerunt oculati. Sed jam securis ad radicem posita est, nec posthac audebit musitare quisquam. Factum enim est speciali Numinis providentia, ut causę huic summam admoveat manum ad Summi Pontificatus apicem evectus Vir omnigenę eruditionis, exactissimę critices, utriusque Juris, Ecclesiasticę Historię, ac profanę, Rei Philosophicę, ac Theologicę, & quod caput est, solidissimę pietatis laude omni pręstantior. Quàm bene! Purpurate Serenissime, cum absque assentationis periculo, summa ipsius post Christum Dignitate seposita, hæc, & plura dici possunt de Authore Tanto; cujus Operum lectione doctissimus quisque doctior evadet. Ipse itaque Doctissimus, ac Sanctissimus Pater causam hanc vix inceptam reperiit: Ipse tramites designat omnes, viamque sternit ejusdem causę ad effectum feliciter, ac breviter perducendę. Hęc, & plura ex literis suis Apostolicis desuper emanatis, beniginitate paterna plenissimis, Reverendissimo Patri

tri Generali Ordinis Nostri Ministro, datis die XVII. Januarii superioris anni MDCCXLVIII. studium Optimi, ac Sanctissimi Pontificis super hoc negotio plenè demonstrant. Ipse ergo, victurus pro totius Ecclesiæ Dei bono, pariter ac votis, in Nestorios annos, causam hanc, quam paterna sollicitudine promovet, feliciter absolvat; scripta de Cœlo delapsa canonizet; Theodidactę Scriptricis instituat Apotheosin, ad Dei Optimi Maximi Gloriam, Sacratissimę Deiparę honorem, in piorum omnium solatium, Ecclesięque Militantis ædificationem.

Et alię quidem bene multę, hujus Panoplię Speciminis Celsitudini Tuę dedicandi suppetunt rationes, altioris momenti per omnem modum. Cui enim congruentiùs dicanda fuerint Arma hæc Militantis Ecclesię spiritualia, (*) potentia à Deo ad destructionem Munitionum errorum, hereticarumque cavillationum, & prompta ad ulciscendum in omnem impietatem, extollentem se adversùs Dominum, & adversùs Christum ejus, ac Christi Vicarium, quàm Regio, ac Serenissimo Infulato, Purpurato Eminentissimo, Regali Sacerdotio secundum ordinem Melchisedech instructo, paribus ad Dignitates amplissimas ornato virtutibus? Jure
insuper

(*) 2. Cor. 10. v. 4. 5. 6.

insuper hereditario Clarissimorum Heroum, Regum Magnę Britannię, ac Polonię, Regias virtutes, animumque senilem in Juvenili Pectore possidenti? Isti equidem Progenitores Tui Augusti, accincti decore, ac fortitudine, Arma secularia strenuè gesserunt, ac feliciter; jactantes romphæas in Ecclesię hostes, jura Regnorum suorum, totiusque Christianę Reipublicę vindicantes asseruerunt.

De Avo Tuo Serenissimo JACOBO Secundo, Magnę Britannię, Franciæ, & Hiberniæ Rege semper invicto, prætereundum non est; quanta cum Animi magnitudine eferatas superaverit Anglorum Turbas, ab impietatis Spiritu iniquissimè in Ipsum concitatas: quanta cum virtute bellum perfidæ, atque ingratisimæ Gentis administraverit: Jura eorum læsa, de Batavo insolenter elato triumphans, vindicaverit. Nec facile dictu est, quanto cum vitæ suæ discrimine hoc præstitit; illo præsertim navali prælio, quo Aplustre Batavum humiliavit; Nave prætoria, cui præerat ardens Archithalassus, ab hostilibus tormentis in assulas conquassata. Nec pedem inde referre vellet; donec laxis compagibus, concussa Navis, ac fatiscens, inter marinos vortices penè subsideret. Nec majorem se præbuit summa rerum Paterni Imperii

C

positus,

potitus, quàm cum Plebis perjuræ, ac tumultuantis, apertæ rebellionis sese subtrahens, non jure cedens, dimiserat: quinimò de Regnis suis proficiscens, nihil omnino fuisse, quod reliquerat, liquidò comprobavit. Justitiam, Pietatem, Fidem, omnes ad unum virtutes secum asportans, eripuit à sceleratis, rebellibus, impiis, atque infidelibus Subditis, quorum potius intererat tanto Regi subesse. Bonum ergo certamen certavit Monarcha Pientissimus, qui improprium JESU sustinens, Fidem servavit, devicit Inimicos Crucis Christi. Hæreditatem hanc immaculatam, quæ Reges Regni Cœlorum instituit, Rex Avus in Regem Serenissimum Genitorem Tuum transtulit, posteris suis clarissimis tradendam; nec pro versatili Anglorum fide, aut instabili eorum Diademate, atque inani Sceptro, in æternum commutandam.

Cui autem comparabitur Heros Ille Gloriosus, Maternus Proavus Tuus, memoriæ immarcescibilis, JOANNES SOBIESKI? Josuæ? Gedeoni? Sampsoni? An Davidi? Ipse est, qui Sarmatarum suorum coacta validissima, atque invicta manu, ad Urbem Metropolim S. R. I. ab immanissimo Turcarum Tyranno, cervicibus Populi Christiani insultante, obsessam; ad deditionem penè conquassatam, erutamque,

accurrit

accurrit ut Leo, advolavit ut Aquila, & sanitas
 in pennis ejus. Is ipse est, qui moræ omnis im-
 patiens, quò citiùs obsidione Urbem eriperet,
 Serenissimo Lotharingæ Duci, Imperialium Co-
 piarum Archistratego clarissimo, ordinando
 rituali intento, quo tanti Auxiliatoris decoro
 prospiceretur, & honori Copiarum Suarum, ut
 par erat; re cognita, occlamavit extemplò:
 Apage inanum Rituum Codicem istum, Dux
 Serenissime! Rex Cracoviæ remansit: nec
 alium Tibi hîc sîsti putes, quàm laborum tuo-
 rum socium, consortem, participem. Quid
 hisce nugis ergo tempus absumimus, luctante
 in extremis Urbe Imperatrice? Eja! Actutum in
 hostes, mihi, meisque quavis demum statione
 consignata. O sententiam tanto Heroe dignam!
 Sed incalente jam pugna, cum fureret in certa-
 mine, Ipso vel Mavorte major, Cataphractus
 Rex; quas non edidit hostilium Legionum stra-
 ges? Caderent cùm â latere suo mille, ac de-
 cem millia â dextris. Cùm exultaret audacter
 Bellator Equus, de Tanti Sessoris Gloria super-
 biens; pavorem contemneret; nec cederet gla-
 dio. Fervens, ac fremens Agmina Turcarum
 densissima dirumpens penetraret, Regio Sessor-
 re necesse quaquaversus distribuyente; donec
 Palladium barbaricum, Primum Pseudopro-
 phetæ

phetæ Vexillum, à primis temporibus intemeratum, infidelibus honoratum, ac Sanctissimum; sed jam Christi Vicario consignanda Trophæa; Signifero barbarico prostrato extorqueret viritim, ac propria virtute Bellipotentis Dexteræ.

Augusto Parenti suppar, horrido isti, ac difficili bello interfuit; etiam & Secundum belli Fulmen, Regius Poloniæ Princeps, Avus tuus Serenissimus, JACOBUS SOBIESKI. Quæ fortitudinis ingenitæ specimina non præstitit Heros Hic, viridi adhuc Spectabilis Ævo vix octodecem annorum, Paternæ virtutis, & Gloriæ Æmulator ubique, ubique Particeps? Id testata sunt Turcarum ad Viennam munitissima perrupta valla; testati ad Strigonium strati cadaveribus Campi; testatus ac toties intinctus, & spumans barbarico cruore Danubius. Nec ambo prius cessarunt à fœdere, aut bello abstinere, quàm Rebus Domus Austriacæ in solidum redintegratis, ac provectis; emendicatam supplex exoraret pacem fœdifragus, ac perjurus Otomannus. Verùm eloquar, an fileam, PRÆSUL CLARISSIME? An bene apud memores veteris stat gratia facti? Non enimverò! Proh pudor!.....

Nonne indignantem totam perculit Euro-

pam, Regiæ Virginis CLEMENTINÆ SOBIESKI.
 (Proh Nomen suavissimum!) ad Arcem Oenipontanam, seu Insprucensem interceptio, arctaque sub armato milite custodia? Siccine ergo, CAROLE Auguste, magni illius JOANNIS SOBIESKI Neptim intercipi cogis, ac vexari? Siccine Jura Sacratissima Gentium apertè violas? Sic amicitiae leges, sic hospitalitatis, omnes simul infringis? Ah! Non ita Leopoldus, Vienna illa Tua ab infidelibus copiis circumvallata. Improbabile facinus istud, & immane, Proborum omnium suffragia damnarunt. Parum est: Ipsimet perjuri, ac rebelles Angli pariter, Usurpator & ipse Brunsvicus, Meticulosam illam, ac plusquam Fœmineam Curiae Viennensis facilitatem, clam deridentes, factum detestati sunt, focii quàmvis fuerint, ac participes delicti. Ipsos interroga: non diffitentur. Verùm Adolescentula Regia Diis genita, ac genitura Deos, forte feliciore, atque ampliore digna, cuique ab incunabulis, in deliciis erat Anglorum salutari Reginam, Hà gentem indignam! Etsi ad tempus intercipi poterat, teneri autem diu non potuerat. Illatis commota injuriis, non angere, non conqueri, non flere, sed veteres Heroidas superans fugam parat, socios indicit itineris, & instruit; Teutonicas eludit Excubias somno

fomno, vinoque sepultas. Quid plura? Nocte
 elabitur intempesta, ac procellosa, paucorum
 Nobilium Affeclarum fideli comitata famulatu:
 nec restitit, donec Bononiam perventum esset,
Dux Fœmina Facti. Euge Factum Amazone tan-
 ta dignum, ipsis hostibus probatissimum!
 Maeste Virago Augusta! Jam verò Reginae Picen-
 tissimæ virtutes reliquas, digno quis possit exi-
 gere stylo? Qui habitus mentis! Qui decor
 vultus, totiusque venustissimi corporis Ordo
 modestissimus! In domesticos Aulæ suæ, quàm
 blanda comitas! Quæ morum suavitas! In Re-
 gem autem quantus amor! Observantia quan-
 ta! Quæ autem cura! (Proh Deum immorta-
 lem!) Quanta sollicitudo! Quæ vigilantia! Qui
 zelus in susceptæ utriusque Regiæ Prolis insti-
 tutione! Augent ista religens in Deum Pietas,
 frequentia sacrorum indefessa, congeminatae
 preces, invicta fides, fixa æternorum spes, in
 Deum, proximumque charitas ardentissima;
 effusa in pauperes materna miseratio. Sed Deus
 terris ratus invidendam transtulit astris. Tametsi
 enim in ætate vigeret adhuc florida, citò
 tamen maturavit ad debitam Immarcesci-
 bilis Gloriæ Coronam. Et hæc paucula de
 tantæ Regiæ meritis, virtutibusque, excur-
 su potius quodam, quàm mora: Reliqua,
 quam

quàm multa ! Biographos dilaudanda man-
neant.

Nec patiar (Quis patiatur enim , CARDI-
NALIS AMPLISSIME ?) filere hìc de Serenissimo
VValliaë Principe, Germano Fratre Tuo CAROLO
EDUARDO. De Regio, inquam, Juvene ASCANIO.
O amabilis Ascani , expectatio Gentium , &
desideratus earum ! Prodeant nunc superio-
rum retro sæculorum omnes ad-unum Fortif-
simi Bellatores, Clarissimi Duces, Laureati He-
roes : Uni omnes ASCANIO Palmam cedunto.
Huc aliquantisper animum advertite, Angli ve-
cordes, & infatuati. Agedum, dicite Rebelles
addicti: Qualem sese præstitisset in similibus re-
rum angustiis, discriminibusque conjectus, qui-
bus suavissimus ASCANIUS Vester, Ille militari
Gloria Illustrissimus HANNIBAL ? Qualem Mar-
cellus Claudius, qui stravit Pænos, Gallumque
rebellem ? Aut cunctator Egregius Fabius ille
Maximus ? Vel Africanus Ipse Scipio ? Num
ASCANIO vestro supparem sese ostendisset Mag-
nus ille Expugnator, ac Domitor Orbis ALE-
XANDER ? Aut Alexandro Major JULIUS CÆSAR ?
Aut major ambobus, novus Alcides, Terror
omnium vestri, ac Fœderatorum vestrorum, Sa-
xo Nobilissimus hodiernus, ipse MAURITIUS ?
Perpendite ex æquo res ; ducite rationes.

Intue-

Intuemini loca, tempora, rudes Ascanii
 copias, Tyrones collectitios penè inermes, belli
 expertes, & ignaros; numero, infra dimidium
 Rebellium agminum vestrorum, semper im-
 pares; præclusos commeatibus aditus omnes;
 nec bellici apparatus, & annonæ caritatem, sed
 inopiam. Actuosissimi deinde, ac vigilantissi-
 mi Ascanii stratagemata crebra, Velitationes,
 Prælia, Victorias. Ad Mancunium usque in
 tractu Lancastriensi, in ipsis Angliæ penetrali-
 bus irruptionem, qua contremuit superba illa
 vestra Augusta Londoniensis, Liberatoris sui
 ad adventum exultare cùm debuisset: expavit,
 & Usurpator ipse, jam jam inde de Regno, non
 suo, facessurus. Egregium subinde, famosissi-
 mumque Ascanii receptum in Albaniam, salvis
 signis, ac dignitate militari; quo nec decem-
 millium Xenophontis regressio gloriosior; in-
 vitis undique ipsum circumstantibus rebelli-
 bus copiis vestris, ad nutum Ducis Cumbricen-
 sis. Ista, inquam, omnia, pensitote. Facta hæc
 Principis vestri imminuite, *mentientes pro more
 vestro*, si audetis. Verùm gloriosissimi, proba-
 tissimique Ascanii Facinora, Rei bellicæ peri-
 tiam, Heroicam in adversis Constantiam, For-
 titudinem, Magnanimitatem, benignissimam
 affabilitatem, effluentem in omnes Regiam Mu-
 nifi-

nificentiam, morum suavitatem humanissimam, venustissimi vultus decorem, pulcherri-
 mumque totius corporis habitum, similem Filio
 Dei, totus de laudat, & personat Orbis; admi-
 ratur invitus, & invidet, Ipse stupens, attoni-
 tusque Brunsvicus: & Vos admiramini, ô per-
 juri rebelles, agnoscentes, vel inviti, in Ascanio
 vestro, Militem, Ducem, Heroem sine pari.

At inquis: Nonnè perdoluit Ascanius?
 Nonnè turbavit animum? Nonnè flevit? Non-
 nè lachrymatus est? Inde ergo amabilius: Inde
 Illustrior: gloriosior inde; inde desiderabilior
 Ascanius meus. Nonnè (*) *infremuit, & tur-*
bavit semetipsum Ipse Filius Dei? Nonnè (*)
contristata est usque ad mortem Anima ejus
Sanctissima? Nonnè (*) *videns rebellem Civi-*
tatem flevit super illam? Nonnè (*) *lachryma-*
tus est JESUS Amici sui interitum? Ad hæc
 quid respondes, Hæretice? Suorum itaque for-
 tem, non suam, flevit humanissimus Ascanius,
 quo Duce Vos indignissimi estis. In justissimam
 autem perduellionis vestræ vindictam, habetis
 durum Cumbricensem, qui risit, & exultavit
 in interitu vestro ad Cladem Fontenoyensem,
 & alibi sæpe. O Deum! Clarissime Mauriti!
 Si instructos in Te duxisset Britannos suos no-
 vus Hic furvus Eduardus! Si Hibernos suos

D

du-

(*) Joan. 11. 13. (*) Mat. 26. 38. (*) Luc. 19. 41. (*) Joan. 11. 35.

duxisset! Non : ita me superi, ad laceffendum alacres reddidisset Gallos vel ipsius Christianissimi Regis præsentissimus clamor, quàm ad fugam præcipites Sanctum, ac Terribile nomen EDUARDUS. (*) *Verum divisum est cor eorum, nunc interibunt.* Abest Eduardus : Io Pæan Galli ! Jubilate, & exultate indubii de triumpho. Copias ducit Cumbricensis perfidæ Gentis Anglicanæ, ac perjuræ. Terga vertant Angli, & Gallis : & cadant, & moriantur, & conterantur, & proculcentur, vidente hæc Cumbricensi siccis oculis, nec miserentē.

Nec minora militaris Gloriæ specimina de Te augurari licuit, Dux Eboracensis Serenissime, cum ad Gessoriacum littus constitisses acer in armis, proximè trajecturus in Angliam ad Augusti Genitoris Tui Jura vindicanda; miserrimos, & obcæcatos Anglos Tuos, ab alienigenarum sæva tyrannide, ac servitute dura, in libertatem Filiorum Dei, Ascanii Tui desideratissimi Gloriæ Socius, asserturus. Verum proh dolor Ecclesiæ Catholicæ ! Proh pudor ingenuorum omnium ! Nusquam tuta fides : corruit in plateis veritas. O Ludovice None Castissime ! Scombrus quidam aulicus, obstupescite, Coeli ! Seu ex orco potiùs emersa Harpyia, Anathemata illi, cadat ante diem,

(*) Osee, cap. II.

in culpa fuit, ut re infecta resilires. Id publicè per totam personuit Europam circumductum Tetraſticon carmen, hiſcè oculis Ipſe vidi, Ipſemet ego legi, exaratum priùs lingua Gallica, Hiſpanica deinde vulgatum; Illuſtriſſimo dictum Duci Richeleo, latus tuum tunc ad Geſſoriacum cingenti.

Verùm ego quid loquor, aut ubi ſum, Inſulate Sereniſſime? Iſta quò me rapiunt terrena, & caduca? Nonnè ſolius Crucis Chriſti ſubſidio effecta eſt Anglorum prima converſio? Nec ſecunda aliter efficienda erit. Ergo miſericordiæ Dei, quam precibus exoret Eccleſia, debebitur perditæ Gentis emendatio; (*) *Niſi enim Dominus adificaverit Domum, in vanum laboraverunt, qui adificant eam.* Hodierna proſectò Anglorum Sors, tametſi non ita miſeranda videatur, quippe quam ſibi ipſimet adſcivere, lachrymis amariſſimis deſtenda tamen eſt. Quæ enim Totius Orbis alia Gens adeò obærata, ac rationibus obſtricta? Nonnè credere reſugit animus, quàm oppreſſa ſit Anglia ære alieno immenſo, atque inſolubili? Nonnè obruta eſt? Nonnè animam debet Gens infelix Anglicana? Verùm damna iſta parvi pendenda. Quis autem æquanimiter tulerit monſtroſiſſimarum Hæreſeon examina tetra longè

(*) Pſalm. 126.

per Angliam, latèque grassantia? Eo enim impudentissimæ contumaciæ, cæcitatique deventum est; ut nulla sit hæresis, error omnino nullus, nulla prorsus impietas, quæ vacuum sine mente Popellum Anglicanum non depopuletur; magnamque sibi videtur assumere Religionem, quia nullam omnino respuit falsitatem. Ibi bene audit Simon Magus, malè autem Simon Petrus. Ibi Cerinthus Impius, ibi Arius, ibi Socinus uterque, ibi blasphemus Servetus, quem nec Calvinus ipse pessimus tolerare potuit, asseclas insanorum Dogmatum suorum, obtentu scilicet reformationis, in procinctu habent; nec auditur Joannes castissimus altè intonans: (*) *In principio erat Verbum, & Verbum erat apud Deum, & Deus erat Verbum.* Verùm, ô sortem adhuc acerbiorẽ gentis quondam piissimæ! Quantum in eos prævaleat spiritus mortiferæ impietatis, qualiterque tot animarum myriades, pretioso Sanguine Agni immaculati Christi, & incontaminati redemptarum, quotidie devoret truculentissimus infernalis Leo; vel maximè testantur innocui gregatim decedentes sine Baptismo, infantuli eorum fanaticorum, quos jam tremblantes, seu tremulos, à quodam Cerdone vilissimo deductos, jam Baptistas appellant.

(*) Joan. I.

Ista patitur Senatus Britannicus de Christiano Nomine, ac Reformato jactantior! Quidni patiatur Synagoga Satanæ? Patimini & vos, immo & ista probatis, Anglorum Infulati. O *Pastores*, & *Idola*, (*) *derelinquentes gregem!* Vos Pastores Gregis Christi? Vos Successores Sanctissimorum Antistitum Augustini, Dunstani, Anselmi, Thomæ, Edmundi, Malachiae, Laurentii, Richardi, Eguini? Vos in (*) pellibus ovinis Lupi rapaces. Isti de supernis (*) erant; vos de deorsum estis. Isti zelo animarum igniti, Apostolorum æmuli, mortificationem JESU in corporibus suis circumferentes, (*) conversationem suam jugiter in Cœlis habebant; (*) vos autem lautè pasti, & opiparè, quoniam de terra estis, de terra loquimini; nitidos vultus, & obesa corpora circumfertis, lascivientes cum mulierculis vestris, pilentis in mollibus, ac stratis eburneis. (*) Isti per ostium introducti sunt in ovile; vos aliunde ascendistis non vocati. Isti veri Pastores erant, pabulo salutaris doctrinæ, immaculatissimeque moribus Oves Christi nutrientes, lupisque sese pro Ovium salute generosè, ac fideliter obijciantes: Vos autem, reprobi mercenarii, fures estis, & Latrones; lupis venientibus nedum non obstititis, sed & obsecundatis, si dei proditores,

ac

(*) Zach. c. II. (*) Matt. 7. 15. (*) Joan. 8. 23. (*) 2. Cor. 4. 10.
 (*) Philip. 3. 20. (*) Joan. 10.

ac Patriæ. Iſti venerunt ut vitam haberent oves, & abundantius haberent; vos autem furari veniſtis, maſtare, & perdere. Verùm qui, & unde eſtis vos? Num de Popina Capitis equini oſcitantès à vino, & vacillantes? Undecumque ſitis, vœ vobis; quoniam *inventus eſt ſanguis animarum pauperum in aliſ veſtris*. Vœ vobis iterum, quoniam quum apparuerit Princeps Paſtorum Chriſtus, paſtores fideles immarceſſibili Corona donaturus; vos, qui non Gregem Domini paſcitis, ſed voſmet, ejiciemini in tenebras exteriores, ubi fletus æternùm erit, & ſtridor dentium. Intelligite hæc, uxorati Antiſtites, & rebelles, qui oblivſcimini Deum, nè quando rapiat, & non ſit, qui eripiat. Audite, inquam, & redite prævaricatores ad cor.

Quoties voluit (vult & etiamnum) Pientiffima Sedes Apoſtolica congregare vos, quemadmodum Gallina congregat pullos ſuos ſub alas, & noluiſtis? Videte, quoniam non quærit datum veſtrum, ſed vos. Nondum laſſati in via iniquitatis animadvertitis, quàm durum vobis ſit contra ſtimulum calcitrare? Expergiſcimini Ebrii, & non à vino charitatis. Quàm ſit invidenda vobis Suecorum, Danorumque conditio, queſo penditote. Apud hos remanet umbra ſaltèm aliqualis unitatis Eccleſiaſtica, Sacræ Religionis,

ac Pietatis pristinae : apud vos autem nè umbra quidem, sed abominatio desolationis , & solitudo mera. Cimbri quidem, ac Sueci , omnes ad unum, tenaciter adhærent (malum est, minùs intolerandum tamen) heterodoxæ confessioni Augustanæ, nec latum unguem ultra; cuius plerique errores , vix , aut rarò quemquam de Plebecula plurimâ concernere possunt, vel afficere; nec Plebani quidquam prætereà docere audent. Infantulos suos regenerari curant omnes ex aqua , & Spiritu Sancto; unde seges propemodum immensa, vel invita hæresi, Ecclesiæ Dei in dies accrescit animarum, Infantum saltèm , quæ salvantur. Apud vos autem, Pastores veterinosi, Præcursores Anti-Christi, unusquisque in suo sensu, seu phrenesi potiùs, abundat; nemo verò est, qui sensum Christi habeat. Unitas omnis doctrinæ, ac disciplinæ exulat. Ecce vobis ex dolio isto vociferatur insanus fanaticus ministellus; ex adverso suggestu Socinianus, Mahometano pejor, Auctas Arianorum blasphemias, à Patre mendacii edoctus, intonat. Hinc muliercula deblaterans, contra Edictum Apostoli populum insanum doctura, furiata mente insilit in Tripodem. Illinc Deista perditissimus, Atheus aliunde, speciem pietatis omnem, certatim, collatisque manibus, convellere nituntur; impunè omnino omnes. Verùm quid mirum?

mirum? Si ex istis ad Episcopales Infulas sine delectu provehuntur, & indiscriminatim? Nonnè Atheus, vel si quid pejus, vir agrestis ille, scænicus egregius, ac simulator toties de perditissima vita præjudicatus, & comperendinatus; Sarisburiensis Burnettus, bis, vel ter uxoratus? Apage Monstrum Infulatum! Apud ipsos insigniores Protestantes memoriæ damnatissimæ. Nonnè Athei, Deistæ, Sociniani, alii bene multi? Videantur eorum in Scriptis perversissima Dogmata. Hęcine Anglorum pretiosa illa libertas! Hęc adeò decantata ad nauseam usque eorum Reformatio nempe? Natio comœda est, HENRICE PIENTISSIME, Gens absque consilio est, & absque prudentia; à planta pedis usque ad verticem, non est in eo sanitas; sed vulnus, & livor, & plaga tumens. Utinam scaperent, & intelligerent, ac novissima providerent. Ostendat eis Dominus misericordiam suam, eosque reducens dirigat in viam salutis æternæ. Tunc ad Regem suum convertentur; quærent cum lachrymis Ascanium suavissimum; Teque, HENRICE SERENISSIME, desiderabunt, quod Probi omnes exoptant. Intercè stent in signum, in Deridiculum, atque in Sibilum cunctis gentibus; cum evanida illa sua, umbratili, ac de mero nomine libertate.

SALUTATIO

Ad Sanctissimum Patrem Nostrium

BENEDICTUM XIV.

Pontificem Optimum Maximum.



S, qui nedum potenter, sed
 & maximè sapienter omnia, quæcumque voluit,
 fecit in Cœlo, & in Terra, Deus Noster,
 PATER BEATISSIME, Ecclesiam suam uni-
 cè dilectam, (*) à constitutione Mundi ædifi-
 cans in Corpus Christi, summè gratiosa, ac
 miranda varietate, stratis per ordinem lapidi-
 bus pretiosissimis exornat, atque distinguit. (*)
 Ut Sapiens Architectus, ac Magnificus fun-
 damenta illius jecit, solidè, immobiliterque
 E in

(*) Rom. 12. 4. 5. (*) Isai. 54, 11, 12.

in Montibus Sanctis Patriarcharum, Prophetarum, Apostolorum, (*) ipso summo angulari lapide Christo JESU; ut verissima sit Turgida illa, sublimis, & extatica Davidici Carminis Sententia: (*) *Fundamenta ejus in Montibus Sanctis*: & illud: *Gloriosa dicta sunt de Te, Civitas Dei!* Civitatem hanc impetendam fore, & arietandam prævidit Artifex Sapiens, ac providus Christus: sed cum ipse Dei Virtus sit, & Sapientia, Portas Inferi (*) adversus eam non prævalituras affirmans adpromittit. Omnem propellit timorem; dubios omnes tollit eventus; cum Spiritum Veritatis à Patre procedentem, ac de meo accipientem, ait VERITAS Ipse, omnem veritatem Discipulos docturum, (*) omnia, quæ Filius à Patre audivit, dixeritque Discipulis, eisdem suggesturum, confirmat, Qui fallere non potest, nec falli, Magister Bonus, Verbum Patris, Caro factum. Nec dixisse semel satis est: Juvat usque id ipsum sæpiùs repetere, altiùsque dicta sua, nè fragili mortalium memoria exciderent, inculcare. Ecce, inquit, *Ego*, non alius: (*) *Vobiscum sum*, nec dicit *ero*: nec ad diem, mensem, aut annum, sed: *Omnibus diebus*: nec ad unum, aut plura Sæcula, sed: *Ad consummationem*
Sæculi.

(*) Ephes. 2. 20. (*) Psalm. 86. (*) Matt. 16. 18.

(*) Joan. 16. 13. (*) Matt. 28. 20.

Sæculi. Hæc est Civitas refugii supra Montem posita, fulgoribus Solis æterni perfusa. Hæc est, inquam, (*) *Ecclesia Dei vivi, quam firmamentum prædicat Apostolus, & Columnam veritatis*; quamque qui non audierit, irrevocabili Servatoris sententia tanquam Ethnicus habendus est, & Publicanus. (*)

Quanta ergo, PATER BEATISSIME, pravitatis hæreticæ cæcitas, quàmque enormis, quæ videre non vult, quam nemo nisi cæcus non videre potest, Civitatis Dei Nostri Magnificentiam, Pulchritudinem, Ornatum, Splendorem! Ornamenta inter innumera, quæ Civitatem hanc Regiam copiosè decorant, adornantque, non postremum merentur obtinere locum; Sancti Doctores. (*) Hi sexaginta sunt illi Fortes, floridum veri Salomonis nostri Lectulum apparatu Terrifico cingentes; omnes tenentes gladios ad bella doctissimi. (*) Hi subinde Custodes, quos Vates Evangelicus vidit, stationibus quosque suis positos, super muros Jerusalem, injuncto sibi mandato, tota die, ac nocte, non tacendi laudare Nomen Domini. Hos Ipse Adjutor in opportunitatibus Deus pro temporum exigentia suscitavit in defensionem Corporis pariter, ac

E 2

Spon-

(*) 1. Tim. 15. (*) Matt. 18. 17. (*) Cant. 3. 7. 8. (*) Isai. 62. 6.)

Sponsæ Filii sui, jura ejus qui strenuè asserant, immaculatumque Sacræ Doctrinæ Depositum fartum testum custodiant. Ipsi Spiritu Veritatis edocti, Gladio Spiritus, quod est Verbum Dei, accincti; fide præmuniti, spe fortiter armati, charitate fervidi, hostiles omnes sustinent incursum, errorum latebras detegunt, anfractus omnes insanorum Dogmatum præpediunt, & obstruunt, cavilla tandem Hæreticorum cuncta, ac Technas extricant, ac dissolvunt.

Quæ autem vocatio Tua, OPTIME PONTIFEX, ad hanc Christi compagem? Quod exerces ministerium? Quam geris pro tempore Personam in Ecclesia Dei? Quis es? Quærit ex te in Persona Eugenii Decessoris tui D. Bernardus, () & respondet: Sacerdos Magnus, Summus Pontifex, Tu Princeps Episcoporum, Tu Heres Apostolorum, Tu Primatu Abel, Gubernatu Noë, Patriarchatu Abraham, Ordine Melchisedech, Dignitate Aaron, Auctoritate Moyses, Judicatu Samuel, Potestate Petrus, Unctione Christus. Tu es, cui Claves tradite, cui Oves credite sunt. Sunt quidem & alii Cæli Janitores, & Gregum Pastores: sed Tu tanto gloriosius, quanto & differen-*
tius

(*) 2. de Confid. cap. 8.

tius utrumque præ cæteris nomen hereditasti. Habent illi assignatos sibi Greges, singuli singulos: Tibi universi crediti, uni unus. Nec modo ovium, sed & Pastorum Tu unus omnium Pastor. Mellifluo Patri adstipulatur Ecclesiæ Catholicæ Universitas formidanda, ac Terribilis ut castrorum Acies ordinata. Uno conclamant ore Doctores Catholici omnes: Tu Sacrarum Traditionum fidelis Custos; Tu Doctrinarum Ponderator; Tu Opinionum Discretor; Tu Doctor Doctorum; Tu Divinæ Mentis Interpres fidelissimus; Tu proinde Judex Controversiarum Supremus: Cujus terrestre Judicium, ait Præliator nobilis D. Hilarius, præjudicata auctoritas sit in Cælo; ut qua in Terris ligata sint, aut soluta, statuti ejusdem per conditionem obtineant & in Cælo.

Jure ergo Specimen hoc Panopliæ Sacræ, qua munita sub tanto Ductore Militans Ecclesia Sancta Dei in aciem procedit, impietatem omnem debellatura, Sanctitati Tuæ ad Pedes consignatur. Jure sub Pastoris vigilantissimi umbraculum accurrunt Canes, Satellites fidi, & Custodes Gregis, Domino suo adblandientes. Jure, inquam, ad Summum Doctorem aggregantur in procinctu Doctores illi, qui, sub Magni Parentis Augustini sig-

nis, obtinent in Aulis Ecclesiæ Catholicæ Principatum. Ergo præcipuos Scholæ Coryphæos, eo quo sibi met succedunt Ordine temporum, Sanctitati Tuæ suscipiendos objicit, ac suscipiendos, Serenissimus Introducitor HENRICUS STUARD SOBIESKI, Dux Eboracensis Amabilis, Almæ Nostræ Metropolitanæ, ac Patriarchalis Ecclesiæ Hispalensis longè per Orbem, latèque Illustrissimæ Canonicus, Archidiaconus Carmonensis, à Te, PONTIFEX OPTIME, in partem Pastoralis Curæ assumptus in Archiepiscopum Bononiensem, postquam in Sacrum, Amplissimumque Collegium S. R. E. Cardinalium Ipsum coaptassēs. Mecœnas ille Charissimus, Clarissimusque. Tu *Æstimator Augustus*, Summe Pontifex, Tu *Judex*. Quò autem ordinatiore methodo procedam, Specimen hoc in septem Articulos distinguam. Dicta (*) porrò, ac dicenda à me hìc, aut alibi quovis, omnia pedibus, ac judicio Sanctitatis Tuæ, ac Sanctæ Romanæ Ecclesiæ humiliter subjicio, ac libenter: Etenim nec verbulum vel unicum proferre volo, aut intendo, quod Sanctitatis Tuæ sententiam in aliquo, vel minimo antevertere, aut Constitutionibus Apostolicis quibuscumque, Urbani præsertim Octavi, contravenire potuerit. Sit proinde

ARTICULUS I.

Venerabilis Anglus, plurimùmque
spectabilis Senex, ALEXANDER
ALENSIS offert sese.


DOCTORIS IRREFRAGABILIS nec merita
Te latent, OPTIME PONTIFEX,
neque Doctrina. Eundem & Doctorem
Doctorum, ac vitæ Fontem
appellari in Scholis à plerisque bene nosti.
Quidni autem ita vocitetur, PATER BEATIS-
SIME, Sanctissimorum Juvenum, ac Fratrum
Charissimorum THOMÆ AQUINATIS, ac BO-
NAVENTURÆ Præceptor Clarissimus? Quanti fa-
cienda sit Doctrina, Methodusque hujus clarissi-
mi Doctoris, unus pro, præque millibus Angeli-
cus Doctor Noster D. THOMAS protestatus est.
Etenim inquisitus olim, quis modus esset opti-
mus Sacræ Theologiæ studendæ? Illico respon-
dit: *Exercere se in unico Doctore præcipue.* In-
quisitus subinde denuò, quis Is esset Doctor?
Respondere non dubitavit, ALEXANDRUM
ALENSEM Doctorem eum esse. *Testor*, ait
Gerso, *me ita legisse in Tractatu quodam de*
Visione Dei. Iste plura scripsit opera Ecclesiæ
Dei.

Dei plurimùm proficua. Ego verò de Expositivis taceo, quæ nondum inspexi: de inspectis autem Operibus Scholasticis jamjam audebo proferre. Ista sunt: priùs: *Summa Theologica* locupletissima in quatuor Partes ab ipsomet Authore distributa, Jussu Innocentii Quarti Decessoris Tui elaboratè conscripta, in Quæstiones, Membra, & ista quandoque in Articulos, methodo mira, ac varietate, distincta; in qua quidquid in Sacris Bibliis, in Sanctorum Patrum Scriptis, Philosophorumque monumentis, aut abditi, aut reconditi erat; sicut eruditè, ita piè, longè exaratum, explicatumque est. Ut facile deprehendere sit, posteriores omnes Theologos ex hoc uno uti ex Fonte cuncta sparsim exhaustisse. Subinde à septuaginta Doctoribus Parisiensibus approbata, & meritò; probata demum Apostolico ejusdem Innocentii Judicio, ac Diplomate speciali munita. Scripsit prætereà *Summam virtutum*, opus planè aureum, ac Doctore Tanto omnino dignum. Insuper & *Libros Quatuor Sententiarum Magistri* Commentario illustravit egregio: Altero tandem Commentario nobili *duodecim Libros Metaphysicales* Aristotelis, Librosque de *Anima* elucidavit. Solidè, perspicuè, copiosè, subtiliter omnia, & orthodoxè, de quibus sit

ASSERTUM PRIMUM

IRREFRAGABILE.


Universam Doctoris Alexandri
Alensis *complectens*
Doctrinam.

 Ingulas ALEXANDRI VENERABILIS Resolutiones, in Operibus istis proximè laudatis, ad certum exigere calculum, res esset non adeò facilis lectioni potius, ac studio, quàm Notulis Arabicis intento. Proinde quotquot fuerint, totidem Nos ad mentem Tanti Magistri defendere parati sumus. Et primò de *Philosophicis*: omnia itaque, ac singula ejus Placita defendimus, sive ad *Logicam* ea pertineant, sive ad *Physicam* Peripati, sive ad *Animaasticam*, ut loquuntur Nostrates, sive ad *Ethicam*, sive ad *Politicam*, sive denique ad *Metaphysicam*. Laudabiles tamen Neotericorum Conatus in perquirendis, ac mechanice explicandis Phænomenorum causis, Rerumque Naturalium proprietatibus, effectis, usibusque; ubi sibi bene constiterint, nec verbo Dei, quod Caput est, scripto, vel tradito contrariari deprehendantur.

F


tur,

tur, gratanter amplectimur. Ubi autem irriti hæserint, aut æqua lance steterint, vel dubia : unusquisque in suo sensu abundet. Nos, nè in *Physicis* quidem, *Aristotelem* deferendum judicamus. Porro hæc eadem in sequentibus ad finem usque hujus *Opellæ* dicta esse intelligantur. Secundò de *Theologicis* : omnes etiam Assertiones **IRREFRAGABILIS** Nostri Ducis, Sacrosancta Fidei nostræ Mysteria, moresque totius Populi Christiani ad Amussim Sacræ Doctrinæ componendos, quoquo modo concernentes, *Defendendas* suscipimus ; sive pertineant Resolutiones istæ ad eam, quam vocant *Theologiam Speculativam*, seu *Scholasticam*; sive ad *Asceticam*; sive ad *Polemicam*; sive ad *Positivam*; sive denique ad eam, quam *Moralem* vocant, & quidem pro utroque Foro. *Afferimus* prætereà: Rationes omnes **ALEXANDRI** Venerabilis ad singulas Resolutiones, sive probativæ proprii sensus illæ sint, sive sensus alieni infirmativæ, ut ita dicam, sive ad Objectiones responsivæ; in omnibus supradictis tam *Philosophicis*, quàm *Theologicis*, bene, & efficaciter probare, improbare, satisfacere.



ARTICULUS II.

Tempore solo Minor Alexandro
Magistro suo, succedit D. THO-
MAS AQUINAS, Clarissimi Or-
dinis Prædicatorum Nobilis Alum-
nus, Splendidum Ecclesiæ Lumen,
DOCTOR ANGELICUS.

E Angelico Doctore HOC, plurima
â Sanctitate, â Doctrina præconia
Illustrissima, BEATISSIME PA-
TER; ni satius esset omnino silere,
quàm congerendo pauca laudare remis-
sè. Ple-
nus est: nec laudationis nostræ egens, cujus
universum per Orbem tuba ex auro ductili buc-
cinat encomia, laudesque jugi canore nunciat,
& concelebrat Ecclesia. Convertamus itaque ad
Opera ejus aliquantisper, doctrinamque, ser-
monem, quibus evolvendis operam nostram
pro modulo semel impendimus, & iterum, ite-
rumque sinè tædio, aut fastidio. Ubique sibi
Constans mole, sua stat. Quantum instar in
Ipso

Ipso est ! Rem acu profectò tetigit , qui prior ista protulit : *Stylus brevis , grata facundia , Celsa , Clara , firma Sententia*. D. THOMAM itaque meritò deprædicant , efferuntque omnes , de Ore cujus Angelico ubique splendor absistit , Lucidus Ordo , Methodusque mira. Rem plurimis fortassè mirandam audebo : Neminem prorsus æstimare posse , quanti faciendi sint cæteri omnes Scholæ Principes , qui Opera D. THOMÆ non perlegerit penè ad scribendi sollicitudinem ; neminem , qui ita perlegerit , ausurum impugnare bona fide. De exilitate mea fatebor , PATER BEATISSIME , D. N. Subt. SCOTI , de quo infrà , mentem nunquàm assequi potuisse , si tamen assecutus sum ; nisi ita pridem Opera hujus Angelici Præceptoris perfecta habuissem. Id ipsum de cæteris Scholæ Antesignanis , quorum Opera præ manibus habere poteram , de Condiscipulo ejus Doctore Seraphico , de utriusque Præceptore ALEXANDRO proximè laudato , de Duce Nominalium Ochamo nostro , de Aureolo , aliisque nonnullis palàm profiteor. Revera Doctor ipse Angelicus hanc Sacræ Theologiæ Provinciam à Patre Luminum sibi amandatam solus habuisse videtur præ cæteris. Quæ namque alii sparsa tradidere , ipse in unum corpus coegit eo , quem omnes

Theologi meritò demirantur, ordine, methodo perspicua, solidaque subtilitate. Hic Ipse solus regnare videtur, aliisque omnibus jura dare. Hic videre est hunc Ecclesiæ Catholicæ Benjamin adolescentulum in jugi mentis excessu, ac dicentem : (*) *Audiam, quid loquatur in me Dominus Deus: (*) loquere, Domine, quia audit Servus tuus.* Ita avida aure, & attenta, Eundem cerno haurientem in abscondito Thesaurum desiderabilem Sapientiæ ejus, quæ trahitur ab occultis, quam postea sine invidia communicaret; palam eructans pleno de pectore verbum bonum, verbum pietatis, verbum salutis. Opera ejus appello, quæ in Scholis omnium manibus quotidie teruntur; de quibus & nos anno superiore 1747. ita Triduo Ceramine Accademico in hac Antoniana Æde Hispalensi propugnâvimus sequentis tenoris Assertum:

Systema Thomisticum Doctrinam universam Doctoris Angelici D. THOMÆ AQUINATIS complectens; ad genuinam ipsius mentem, Regidiorumque Thomistarum in Sacro Prædicatorum Ordine sensum defendimus. Auctoritatem extrinsecam, simul atque intrinsecam ejusdem Sanctissimi Præceptoris propugnâmus.

(*) Psalm. 84. (*) I. Reg. 3.

Hinc

Hinc asserimus in Scriptis tanti Doctoris nullam reperiri conclusionem; quæ ulli falsitati sit obnoxia, aut quæ solida veritatis non sit plena: nullum Antilogium; inconsequentiam nullam; sed omnia sibi aptissimè constare, & coherere. Demum: omnes, & singulas rationes, quibus sua probat, aliorumque Doctorum placita impugnat, dissolvitque, efficaces esse, ac legitime probare, faventibus Superis, demonstraturi sumus.

Nè cui autem dubium suboriri posset, de quibus Operibus sic protulerim, sequentia in edicto tum evulgato ad calcem significare curavi. Summam Theologicam in tres partes divisam: Summam Catholicæ Fidei contra Gentiles: Scriptum in quatuor Libros Sententiarum Magistri Lombardi: Scriptum secundum in eisdem quatuor Libros ad Annibaldum Cardinalem: Opuscula majoribus characteribus notata: Quæstiones, quæ Disputatæ vocantur: Quæstiones duodecim quodlibetas: Expositionem in primum, & secundum Perhiermenias: Expositionem in primum, & secundum Posteriorum Analiticorum: Expositionem in octo Libros de Physico auditu: Commentaria in quatuor Libros de Cælo, & Mundo: Commentaria in primum, & secundum de Generatione: Expositio-

nem in quatuor Libros Meteororum : Expositionem in tres Libros de Anima : Expositionem in parva Naturalia : Expositionem in duodecim Libros Metaphysices : Tractatum de Ente, & Essentia : Expositionem in decem Libros Ethicorum ad Nicomacum : Expositionem in octo Libros Politicorum. Et hæc de Operibus.

Data quidem opera Spartam istam navare decrevimus signanter ad sensum Rigidiorum Thomistarum in Sacro Ordine Prædicatorum: penes quos enimverò, absque ullius injuria dixero, mentem D. THOMÆ, verumque intellectum invenisse me rebar; aut certè sperabam saltèm. Quî enim, inquam, fieri potuisset, ut in Ordine Nobili summorum Theologorum feracissimo, Ejus, quem sibi à tot Sæculis in Ducem adoptavit, ac Præceptorem, mens lateret, sensusque? Inter Hosce porrò, præsens quod attinet institutum, adnumerare clarissimos aliarum institutionum Theologos, Scholæ Dominicanæ Thomisticæ Assedlas, minimè detrecto; sive Regulares illi sint, uti Hieronymus Perez, Zumel, Palanco, Hurtado, PP. Salmanticenses, alique; sive Presbyteri Sæculares, ut Illustrissimus Castel, Carboni, quos omnes honoris causa nomino. Tacebo ipsius Clarissimi Ordinis

nis Theologos : nam , ut ceteros prætermittam , quibus aliorum incedere placuit , quis modus orationis esse posset , qui finis , si vel præcipuos ipsius Angelici Præceptoris Discipulos nominare vellem ? Quid inquam de Capreolo , de Eminentissimo Cajetano , Bañez , Melchior Cano , Alvarez , Ferrariensi , Soto , Bergomenfi , Ferre , Joanne . à Santo Thoma , Nazario , Caponi , Lemos , Godoy , Gonetto , Aliaga , Montalvan , Perez , Benitez de Lugo , Massoulie ? BONE DEUS ! Quantos Viros ! Horum itaque vestigiis iterum insistens , Armam capio Thomistica , supradictum Assertum denuò defensurus ; ordine dilucidiorē , nonnihil , atque explicatiore .
 Sit itaque



ASSERTUM SECUNDUM THOMISTICUM,

*Doctrinam Angelici Doctoris (ad
sensum Rigidiorum Thomis-
tarum) complectens
universam.*

DIVUM THOMAM tot patrassse
miracula, doctrinales quot exaravit Ar-
ticulos, prædicat in Apotheoseos suæ
Bulla Summus Pontifex, PONTIFEX
OPTIME BENEDICTE, Decessor tuus
Joannes Vigessimus Secundus: nec id mirum esse de-
bet Sanctitatem doctrinæ tanti Doctoris æstimanti.
Quo autem pacto tot miracula effecisse perhibetur,
quot scripserit Articulos, qui in nullo fermè discipli-
narum genere quidquam reliquit intactum, inexplora-
tumque? Nimirum, quoniam ubique sibi constans,
suique similis Ipsius, ubique scripsit, ait alter Decessor
tuus Clemens VIII. in omni fermè disciplinarum ge-
nere, miro ordine, sine ullo prorsus errore, OMNIA.
Hoc itaque miraculorum caput est, Hoc summum.
Patrent alii miracula transitura. Patrat Angelicus Doc-
tor

tor in æterna tempora duratura miracula: Ita & Christi: *Cælum, & terra transibunt, verba autem mea non transibunt.* O miracula Doctoris Angelici! Quæ! Quot! & Quanta! Sanè de Numero horum miraculorum alii laborent, quibus per otium licet. Nos de eorum qualitate, & conditione certos calculi non morantur. Spondeo proinde Deo Duce Optimo Maximo, à me nullum defensum iri errorem, Sanctissimi hujus Doctoris dum defendero miracula; Dogmata, inquam, ejus universa, inconcussa, tutissimaque, ad genuinam ejus mentem, Rigidiorumque Thomistarum in Sacro, ut præfertur, Ordine Prædicatorum sensum. Et primò: Dogmata Philosophica Ipsius, quæqua patent per Opera ejus suprà recensita dispersa, defendimus universa: sive ad *Logicam* ista pertineant, sive ad *Physicam*, sive ad *Ethicam*, sive ad *Politicam*, sive ad *Animaasticam*, sive denique ad *Metaphysicam*. In omnibus istis Doctorem Angelicum absque ullo prorsus errore, seu falsitate scripsisse, affirmamus. De Neoterico- rum laudanda solertia recolligantur supradicta in Asserto Alexandri. Secundò: venio ad Dogmata Theologica Doctoris Angelici, in Operibus paulò superius agnominatis satissimè contenta. Ista omnia esse omnino verissima, immunissimaque ab omni prorsus errore, nedum Theologico Doctrinali, seu Practico, sed etiam purè speculativo, enixè asserimus, ac defendimus: sive pertineant ad Theologiam, quam purè Speculativam, seu Scholasticam vocant; sive ad Asceticam, seu Myst-

^{sr}
 ticam; five ad *Polemicam*, seu *Controversam*; five ad *Ex-*
positivam Veteris, ac Novi Testamenti; five ad *Ethi-*
cam Sacram, seu *Moralem*, & hoc tam pro Foro Poli,
 quàm Fori, Ecclesiastici, quàm Civilis. Omnia in su-
 pradictis Angelici Præceptoris Operibus appositè
 sibi cohærent & optimè; nullus Paralogismus; nullum
 inibi Antilogium. Omnes denique rationes, quibus
 Angelicus Doctor Dogmata sua probat, five Philo-
 sophica, five Theologica; aut aliorum Doctorum Pla-
 cita refellit, aut objecta sibi diluit; optimè, dicimus,
 & efficaciter probare, refellere, ac diluere. Sicubi
 problematicus est Angelicus Parens, nos de mente
 ipsius utramque problematis partem ad obji-
 cientis libitum defendere parati sumus,
 cum cæteris Rigidioribus
 Thomistis.



ARTICULUS III.

Alter, & Idem succedit dilectissimus Doctoris Angelici Pylades, Condiscipulus, & Collaureatus, Alexandri Alensis altera Corolla, ac *magnæ Spes Altera Romæ*,
 DIVUS BONAVENTURA,
 Clarissimi Ordinis Minorum Nobilis Alumnus, S. R. E. Cardinalis, Episcopus Albanensis, Ardens, & Lucens Ecclesiæ Lucerna,
 DOCTOR SERAPHICUS.

PLURIMUS essem, PATER BEATISSIME, & in Volumina copiosa penè diffundendus, si per tempus congerere liceret, quæ, vel per exteros, in commendationem Sanctitatis, ac Doctrinæ hujus Seraphici Doctoris passim conscripta sunt. Laus Sanctitatis ejus in Ecclesia

clesia Sanctorum ; cuius , adhuc viventis , Apo-
 theosin prævênit Primus , brevi quidem , at
 sententia tamen ampla , ac turgida , Præcep-
 tor ejus ALEXANDER de eo prædicans : *In gra-
 tioso Juvene BONAVENTURA Adamum
 non peccasse videri*. Iterum prævênit nulli se-
 cundus Condiscipulus ejus , ANGELICUS AQUI-
 NAS , qui , eundem dum in mentis excessu rap-
 tum deprehendisset coram Crucifixo ; ad suos
 conversus inquit : *Sinamus Sanctum ; laborat pro
 Sancto*. O BONAVENTURAM ! O Sortem !
 Quanta præconia ! Præcones quantos ! Laudes
 autem Doctrinæ ejus , quæ flammea , quæ ig-
 nita , quæ ardens , quæ affectuosa , quæ suc-
 culenta , quæ denique Sapida tota est ; à Do-
 mesticis mutuari nolo. Quas ipsi ab exteris
 mutuati sunt , mutuabor & ego , paucas ta-
 men ; nam si omnes , qui tandem futurus
 esset Orationis finis ? Quanti fecerint Decesso-
 res tui , OPTIME PONTIFEX , & Eruditis-
 sime , Dogmata mirifica Seraphici Doctoris , etsi
 minimè *Sanctitatem tuam* lateat , in gratiam
 tamen aliorum breviter recolendum. Etenim
 pro Cœlesti , qua præstitit , sapientia acceptis-
 simus , gratissimusque fuit B. Gregorio X. cu-
 jus eximiae Sanctitatis testem Te Ipsum appello ,
 PATER OPTIME , in Opere nobilissimo de

Servorum Dei Beatificatione , & Beatorum Canonizatione, in Appendice ad Lib. 2. à Pag. 673. ad Pag. usque 724. Hunc , inquam, SAN-
TISSIMUM PONTIFICEM , cui probè perfectà erat castissima BONAVENTURÆ Doctrina , Pietasque probatissima , eundem , etsi nolentem , auctum amplissimis honoribus Cardinalitio , & Episcopali ; Concilii Lugdunensis Subpræsidentem nominasse testatur Andræas Saussajus in Martyrologio Gallicano tom. 1. ad diem 14. Julii per hæc verba : *Doctrina admirabili , & vitæ Sanctimonia singulari clarus (BONAVENTURA) Cœlestem in Patriam abiit , dum in Concilio Lugdunensi adesset : ad quod , ut præfulgidum Ecclesiæ Sydus fuerat evocatus à Gregorio X. Papa , ut illius potissimum Opera in componendo Græcorum Schismate uteretur. Cujus (post edita eo in Augusto Cætu ingentia sapientiæ sibi divinitus inspirata , necnon miræ pietatis lumina) repentinus occasus , magnum , non modo Pontifici Maximo , & Patribus Latinis , sed Græcis etiam , qui Virum Divinum magna in veneratione habebant , luctum attulit. Quid ? Quod Ipse SS. Gregorius publicè lugens , testatus est : in obitu BONAVENTURÆ Ecclesiam Dei magnam incurrisse jacturam !*

Verùm uberiùs de Doctrinæ ejus præstantia, Decefforis Tui Sixtus uterque IV. & V. Ille quidem in Bulla Canonizationis: *Ea namque, inquit, de divinis rebus fcripfit, ut in eo Spiritus Sanctus loquutus videatur* Et Iste in Bulla Doctoratus: *Fuit enim, inquit, in S. BONAVENTURA id præcipuum, & fingulare, ut non folum argumentandi fubtilitate, docendi facilitate, definiendi folertia præfaret, fed divina quadam animos permovendi vi excelleret: fic enim fcribendo cum fuma eruditione parem pietatis ardorem conjungit, ut Lectorem docendo moveat, & in intimos animi recessus illabatur, ac denique Seraphicis quibusdam aculeis cor compungat, ac mira devotionis dulcedine perfundat. Quam fanè gratiam in ejus ore, & calamo diffufam admirans Prædeceffor noster Sixtus IV. Pontifex; illud dicere non dubitavit: Spiritum Sanctum in Eo loquutum videri. Verùm qui ifta plura, Bullam adeat utramque. Suffragatur Mauritius Brefius Doctorem Seraphicum appellans *Mundi Lucem, Ecclefie Sydus clariffimum, Facem Evangelii, Falcem Herefeon, Ventilabrum Ecclefiafticorum Dogmatum, Securi emortuarum, & infrugiferarum Arborum, Propugnaculum Catholicorum, Arcem Fidelium.* Nefcio,*


cio, ait piissimus Gerſo, ſi unquam talem Doctorem ſicut **BONAVENTURAM** habuerit Studium Pariſienſe. Et alibi: Si queratur à me, quis inter ceteros Doctores plus videatur idoneus? Reſpondeo ſinè præjudicio, quòd Dominus **BONAVENTURA**; quoniam in dicendo ſolidus eſt, & ſecurus, pius, juſtus, & devotus: dum ſtudet illuminationi intellectus, totum refert ad pietatem, & Religioſitatem affectus. Et alibi etiam: Sortitus eſt idcirco ſecundum laudem vitæ ſuæ, pariter & Doctrinæ, nomen ipſe **BONAVENTURA**, ut antonomatiçè Doctor Seraphicus nominetur. Docet hoc in ſpeciali, ſuum Itinerarium mentis in Deum, opusculi, immo Operis immenſi, cujus laus ſuperior eſt ore mortalium. Docet & ſuum Breviloquium..... Et iterum alibi: Nefcio ſi præcipuus inter omnes numerandus ſit Euthychius... **BONAVENTURA**... Ille enim ſingulariter inter omnes Doctores Catholicos, pace omnium ſalva, videtur idoneus, & ſecuriſſimus ad illuminandum intellectum, & ad inflammandum affectum.

Conſentit Trithemius de Scriptoribus Eccleſiaſticis. Ardentia verba proferens, ait, non minus affectum legentis in Chriſti amore accendit, quàm intellectum Doctrinis Sanctis
illu-

illuminat: Omnes enim sui temporis Doctores
 utilitate Operum facile præcellit, si Spiritum
 Divini Amoris, & Christianæ devotionis in
 eo loquentem attendas. Profundus est, non
 verbosus, Subtilis, non curiosus, disertus, non
 vanus; flammantia, non instantia verba pro-
 ferens: unde & securius legitur, facilius ab
 amante intelligitur, utiliùs frequentatur, dul-
 ciùs, & fructuosius retinetur. Multi Doctri-
 nam proferunt, devotionem prædicant multi,
 pauci scribendo Libros, docuerunt utramque:
 BONAVENTURA autem, & multos su-
 peravit, & paucos, dum ejus Doctrina de-
 votio, devotio Doctrinam instruit. Alios
 plurimos missos volo, quò citius ad recen-
 sitionem Operum ejus deveniam. Et præsens
 quidem quod attinet institutum, scripsit soli-
 dè, copiosè, subtiliter, ac devotè, *Commen-
 taria*, & *Quæstiones in quatuor Magistri
 Sententiarum Libros*, quibus mirificè delect-
 atum fuisse Clementem IV. Virum erudi-
 tum, ac Sanctum, perhibet Petrus Annatus
 cum aliis multis. *Librum de Reductione Ar-
 tium ad Theologiam*. *Breviloquium in septem
 Partes divisum*. *Gentiloquium in quatuor Par-
 tes distributum*. *Pharetram per Quatuor Libros
 distinctam*. *Declarationem terminorum Theo-
 logie.*

*logia. Compendiosum Principium in Libros
 Sententiarum. Sententias Sententiarum, Carmi-
 ne digestas. De Quatuor Virtutibus Cardinali-
 bus. De Septem Donis Spiritus Sancti. De
 Resurrectione à peccato ad gratiam. De Tribus
 Ternariis peccatorum. Diatam Salutis per Ti-
 tulos decem ordinatam. Meditationes Vitæ
 Christi. Lignum Vitæ. De Quinque festivitati-
 bus Pueri JESU. Officium de Passione Domini.
 Opus Contemplationis. Laudismus de Sancta
 Cruce. Philomena de septem Verbis Domini in
 Cruce. Speculum B. MARIÆ Virginis. Of-
 ficiū de Compassione B. MARIÆ Virginis.
 Corona B. MARIÆ Virginis. Carmina super
 Canticum Salve Regina. Laus B. MARIÆ
 Virginis. Psalterium Minus B. MARIÆ
 Virginis. Psalterium B. MARIÆ Virginis. De
 decem Præceptis. De Regimine Animæ. De
 gradibus Virtutum Formulam Auream. De Pug-
 na Spirituali contra Septem Vitia Capitalia.
 Speculum Animæ. Confessionale. De Instructio-
 ne Sacerdotis ad celebrandam Missam. Exposi-
 tionem Missæ. De sex alis Seraphim. Collatio-
 nem de Contemptu Sæculi. De septem gradibus
 Contemplationis. Fascicularium. Soliloquium.
 Itinerarium mentis in Deum. De septem Itine-
 ribus Æternitatis. Incendium amoris. Stimulus*

⁵⁹
 lum amoris in tres Partes distributum. De Ec-
 clestiastica Hierarchia quadripartita. Legenda
 Sancti FRANCISCI. Expositionem in Regu-
 lam Fratrum Minorum. Determinationes Quæs-
 tionum circa Regulam S. FRANCISCI. Apo-
 logeticum in Adversantes Ordini ejusdem Se-
 raphici Patris. De Tribus Quæstionibus ad
 Magistrum innominatum. De Paupertate Chris-
 ti. De Sandaliis Apostolorum. Apologiam Pau-
 perum. Bibliam Pauperum. Alphabetum Reli-
 giosorum. Collationes octo. Speculum disciplina.
 De Profectu Religiosorum. De Perfectione Vi-
 tæ ad Sorores. Summam de Essentia, Invisi-
 bilitate, & Immensitate Dei. De modo Con-
 fitendi, & de Puritate conscientia. De sex alis
 Cherubim. Mysticam Theologiam. Com-
 pendium Theologica Veritatis in sep-
 tem Libros divisum. De quibus
 omnibus sit



ASSERTUM TERTIUM SERAPHICUM,

*Doctrinam Sancti Bonaventuræ
comprehendens universam.*



Abes ex supradictis, PATER BEATIS-
SIME, quid sentiendum judicaverim de
primis duobus Scholæ Doctoribus, Ven.
ALEXANDRO HALENSI, & Angelico
Doctore DIVO THOMA. Hi Duo planè
in Scholasticis disciplinis, Scriptorum copia longo
intervallo Doctorem SERAPHICUM antecellunt:
DIVUS AQUINAS præsertim, cui nullo negotio Scho-
lastici omnes concedere tenentur. Nec id quisquam
mirari debet. Ea enim extitit de DIVO THOMA for-
tissima Numinis, ac suavissima Providentia, ut Eum
uni huic Operæ mancipatum voluerit; nec à docen-
do, ac scribendo distrahi permisit; quantumvis id
Summi optaverint Pontifices, quibus patebant, quæ
neminem in Ecclesia Dei tota latuere, Viri Sanctis-
simi doctrina, virtutes, ac merita. Aliter de Doctore
N. SERAPHICO provîdit; quem adhuc Juvenem,
munere docendi, ac scribendi avulsit, Ordinisque
nostri periclitantis, ac penè subsidentis, regimini præ-
fecit.

fecit. Nec Clavum dimittere permisit, donec diem
 extremum obiret Lugduni Navarchus Fidelis, ac Sanc-
 tissimus, postquam octodecem exegisset annos in
 ministerio, gravissimis assidue interim negotijs dis-
 tentus. Ergo hic non de numero, aut mole Scripto-
 rum Sanctissimi DOCTORIS, quæstio agitanda; sed de
 qualitate doctrinæ, de pondere rationum, ac momen-
 tis. Et primò in *Philosophicis*: Doctoris N. SERAPHI-
 CI Dogmata inconcussa universa defendenda adop-
 tamus, quæqua extenduntur ad Quæstiones *Logicas*,
Physicas, *Animastricas*, *Ethicas*, *Politicas*, *Metaphysicasque*.
 Ea sibi omnia bene cohærent absque errore ullo,
 Antilogio, aut Paralogismo. Secundò in *Theologicis*:
 Methodicè hic, ac Systematicè Doctor SERAPHI-
 CUS, per Opera omnia proximè recensita. Proinde
 Dogmata ipsius sapida, atque ignita, ad quintupli-
 cem Theologiam, *Speculativam*, *Mysticam*, *Exegeticam*,
Polemicam, ac *Moralem* pro utroque Foro, Ecclesiasti-
 co, ac Civili, attinentia, defendimus, ut immunissima
 ab omni nævo erroris speculativi, aut practici. Etiam
 & ista potius omnia, sibi bene constant, absque ulla
 Inconsequentia, aut Antilogio. Momenta SERA-
 PHICI Doctoris ubiq; bene probant, & ef-
 ficaciter, bene refellunt, bene, & plenè
 diluunt objecta.



ARTICULUS IV.

Venerabilis Pater Noster, Dux Sco-
tistarum, Theologorum Princeps,
Veritatis Lima, Ingeniorum Phœ-
nix, atque inter Philosophos quidam
Deus, JOANNES DUN-
SCOTUS, MARIANUS, ac
SUBTILIS DOCTOR.

SCOTO nihil arrogamus, PATER
BEATISSIME, magno ALEXAN-
DRO nihil derogamus, Maximo
AQUINATI nihil, nihil SERAPHICO
Doctori: Dum Doctoris Subtilis Ingenium Su-
blime, Cherubicum, ac prope Divinum effe-
rimus super Astra Coeli. (*) *Stella differt à*
Stella in claritate; nec Stellæ propterea stellas
esse desinunt. Stellæ nedum steterunt, sed &
stant quæque in Ordine suo, nec excedunt
stationibus suis. (*) *Lucent cum jucunditate Eî,*
Qui se fecit, easque Vocanti statim respondent,
adfir-

(*) 1. Cor. 15. 41. (*) Bar. cap. 3. 37.

adsumus. In procinctu ergo ad nutum Creatoris stantes, meritò in Sacra Pagina Militia Coeli salutantur. Jam verò quoniam (*) *qui ad justitiam erudiunt multos, fulgebunt sicut Stellæ;* in istis bene Doctores Ecclesiæ adumbrantur; quorum unusquisque proprium Lumen accipit à Patre Luminum, unus quidem sic, alius verò sic. Spirituum Ponderator Ipse Dominus est, qui soli Filio non ad mensuram dat Spiritum; cæteris autem, etiam Doctoribus, dividit singulis prout vult; ad mensuram planè, quam Solus Ipse novit qui concedit. Itaque laudemus Viros Gloriosos, ac Parentes nostros in generationibus suis, consultè tamen, ac modestè, nemini dantes ullam offensionem. Sicuti conferendi inter sese Sancti Doctores, conferantur quæso tanquam Stellæ, non tamen erraticæ, sed fixæ. De quibus profectò, præsentis quod est Instituti, plurimum arridet jucunda fati hypothesis illa, ac magnifica, subindeque Ecclesiæ Dei Militanti quàm optimè accommodanda, de Cartesianis Vorticibus. Quot Stellæ fixæ, tot splendidissimi centrales Soles Vorticibus quibusque suis respondent, Quos sui peculiariter Planetæ Ordine stupendo circumvolvuntur. Sic & in Ecclesiæ Augustissimo Firmamento, Iplis vel Æthereis spatiis

(*) Dan. cap. 12, 3.

ampliore, hærent fixi Doctores, & collucent.
 Quod si ista quisquam non perceperit, dedo-
 ceat eum præjudicia sua Gentium Apostolus,
 pariter ac Doctor, ad Rom. 12. *Sicut in uno*
corpore multa membra habemus, omnia autem
membra non eundem actum habent; ita multi
unum Corpus sumus in Christo, singuli autem
alter alterius membra. Quis unquam oculum,
 quod non audiat, aut aurem, quod non videat,
 conquarentem audivit? Erubescant itaque;
 PATER BEATISSIME, qui ista considerare,
 ac perpendere negligunt; seseque abripi sinunt
 in probra, & maledicta malignitatis impotentis
 æstu, more frementium belluarum furentes, ac
 debacchantes sinè pudore, sinè modestia, ac
 sinè decoro, in Sanctissimos, piissimosque Ec-
 clesiæ Doctores. Nec SCOTO nostro pepercere
 maledici fallaces, Divo THOMÆ nec parcitum
 est, nec vel Ipsi Maximo AUGUSTINO: & hoc
 à Viris Catholicis! Ac sæpe Religionem professis!
 (*) *Si inimicus meus maledixisset mihi, sustinuis-*
sem utique: & si is, qui oderat me, super me
magna locutus fuisset, abscondissem me forsitan
ab eo: tu vero Homo unanimes! Sed
 ista hinc jam faceffant. Ego, sanè, si de piis-
 simo viro, ac Sanctissimo Doctore N. MARIA-
 NO, laudes ingenii, Doctrinæ castissimæ, ac
 (*) Psalm. 54.

sublimis, Humilitatis, Obedientiæ, Modestiae, Castitatis Angelicæ, Evangelicæ Paupertatis, ardentissimæ in Deum, Proximumque Charitatis; Religentissimæ in Ipsum Deum Pietatis, in Christi Domini Sacratissimam Humanitatem, in Purissimam DEIPARAM (ecce totus Mundus abit post eum!) in Christi Vicarium, in Ecclesiam Ipsam; congestas in Eum à Summis Pontificibus, à Cardinalibus Eminentissimis, ab Illustrissimis Infulatis, Episcopis, Abbatibusque, à Theologis, à Philosophis, ab Historicis, à Criticis, à Religiosis Ordinibus, à Principibus, à Cætu denique Fidelium toto Orbe diffuso: si, inquam, laudes ejus istas attexere per tempus, otiumque liceret; priùsq̃am dicendi copia, deficeret vox, spiritusque. Provinciam istam alii fusissimè, æquè, ac doctissimè, solidissimèque exantlarunt: Ego de Doctrina ipsius, anno superiore 1746. pro concertationibus Scholasticis, matutinis, ac pomeridianis, in hac Sacra Hispalensi Antoniana Æde, pro focis, ut ajunt, & aris, sequens propugnaui Assertum:

Omnes Conclusiones, quas Noster Venerabilis, Subtilis Doctor SCOTUS, profundissimè jecit super Quatuor Sententiarum Libros in trino Scripto, Oxoniensi, Parisiensi, seu Reportato-
rum,

rum, & Quodlibetali, ad verbum propugnamus; defendimusque esse speculative, & doctrinaliter immaculatas, id est, immunes ab omni errore, tam Philosophico, aut purè speculativo, quàm Theologico, seu doctrinali: necnon defendimus, omnes, & singulas rationes, quibus SCOTUS prædictas Conclusiones probat, & rationes, quibus per quatuor Sententiarum Libros in trino Scripto Placita, & probationes aliorum Doctorum impugnat, efficaces esse, & legitime probare. Tum: defendimus omnes Maximas, & Problemata, quæ SCOTUS per quatuor sententiarum Libros Oxonienses, Parisienses, & Quodlibeta dispergit subtilitate mira; asserimusque in Scriptis tanti Doctoris nullam reperiri contradictionem, aut inconsequentiam. Tum: defendimus omnes Conclusiones, Rationes, Maximas, & Problemata, ex quibus adequatè coalescit universa SCOTI Philosophia, in qua sequentes continentur Tractatus: Grammatica Speculativa: Quæstiones in universam Logicam: Quæstiones super Libros de Anima: Expositio in duodecim Libros Metaphysica Aristotelica: Conclusiones Metaphysicales: Quæstiones subtilissimæ super Libros Metaphysica Aristotelis: Tractatus de Rerum Principio: Tractatus de Primo Principio: Theore-

mata

*mata viginti tria : Collationes Parisienses :
Tractatus de cognitione Dei : Quæstiones Mis-
cellaneæ de formalitatibus.*

Nec pœnitet , BEATISSIME PATER,
de Doctore nostro MARIANO ita protulisse, cu-
jus merita , nec exæquant ista , nec ampliora
valent exæquare. Sugillatur â nonnullis, & velli-
catur , proptereâ quòd abstrusior plerisque vi-
deatur , captuque difficilior. Ego tamen scire
ab istis vellem, quicumque illi sint, an sibi blan-
diantur de assecuta semper Angelici Doctoris
mente , an aliorum identidem Doctorum men-
tem , sensumque assequantur ? Dicant unde
unusquisque incipiat , quò , & quâ tendat ?
Puteus altus est uterque. Ego de me fatebor,
in hosce quatuor viventium aquarum. Puteos,
bolidem injeci, semel, & iterum ; ita unum-
quemque profundissimum probavi ; ita D. THO-
MAM , ita SCOTUM ; altissimum quemque
deprehendi , ut admirans obstupescam. SCO-
TUM ergo reconditum esse , abstrusum , sen-
susque profundissimum, ultrò fatemur. At isti id
sibi vellicatores , non SCOTO vitio vertant,
quòd ab ipsis non capiatur. An proptereâ Sol
de fulgoribus insitis remisisse quidquam dicen-
dus erit , quòd acies intuentis oculi palpitat, &
caligat ? Hærens Cardanus addubitat , quis su-
bli-

blimioris ingenii, acutiorisque, an Aristoteles, an Euclides, an verò SCOTUS? *JOANNES SCOTUS*, ait Franciscus Picus Mirandulanus, *ab ejus sectatoribus plurimum extollitur, & rectè, cum Homo vegeti ingenii fuerit, & perspicacis.* Eòdem recidit ex eadem amplissima Mirandulana Domo, Joannes Picus: *Est in JOANNE SCOTO*, ait, *vegetum quoddam, atque discussum.* Characteristicè quidem Princeps uterque clarissimus. Ea enim est SCOTI ingenii vivida vis, & virtus; ea mentis acies acerrima, ut sub interiora velaminis irrumpens, gestiat scrutari quadamtenus, etiam profunda Dei. *Mysteria fidei ita scivit, ut pene non crederet*, ait Petrus de Labbè è Clarissima Societate JESU. Hinc Hæreticis formidabilis, infensissimusque, vocitatur *Papicolarum Hercules*. Accedite, Hæretici; impotentis rabiei æstu perciti: Papicolarum Herculi clavum conaminor extorquere, si audetis; Spiritum in eo pertimescite Augustini Redivivum.

Sanè Illustrissimus Jacobus Benignus Bossuettus; Sidus Ecclesiæ Gallicanæ Splendidum; Meldensis Episcopus, Protestantium novatorum Terror, ac Malleus: (Legite, miserrimi Protestantes, historiam variationum vestrarum, legite animadversiones in amentissimum

minif

ministellum Jurieu , Scipionem pariter , & opprobrium litis vestræ, millies damnatæ, millies conquassatæ) Is , inquam , Infulatus Illustrissimus , in pretioso libello de *nova questione*, affirmat, *SCOTUM*, ejus , *quæ in Scholis traditur disciplina*, *Fontem quodammodo esse videri* ; cujus vel unius Viri suffragium pro millibus esto. Ego verò, jam quid prædicem immaculatæ Doctrinæ, ac Pietatis acervos ab SCOTO illatos in Ecclesiæ Thesauros , & ab Scotistis ? Quot erudiverit in Aulis suis Viros Sanctitate, ac Doctrina clarissimos, solus novit, qui numerat multitudinem stellarum, & omnibus eis nomina vocat. Quot in diptycis Sanctorum relatos , & propediem referendos, Martyrès, Confessores , ac super candore nivium dealbatas Virgines ? Quos Ecclesiæ Dei Pontifices Summos ? Eminentissimos Purpuratos, quot, & quantos ? Quos Infulatos Illustrissimos ? Hæreticæ pravitatis Quæsitores Zelantissimos ? Doctoralibus Infulis insignitos sine numero ? Quò fessum rapitis Angeli veloces turmatim volantes, tamquàm nubes imbriferæ, ad gentes convulsas , ac dilaceratas, ad Populos terribiles, ultra quos non est alius, Imperium Crucis Christi, extra anni Solisque vias prolaturi ? Et hæc tanta SCOTUS pauperculus , Doctor nudipes,

adolescentulus, & multis contemptibilis valde!
O Paupertas ! Sed est merces operi tuo. In die
illa dabit tibi Dominus (*) *Coronam pro cine-*
re , Oleum gaudii pro Luctu , Pallium Laudis
pro spiritu mœroris.

Erigat ex orco jam caput insanum, Jovius
mendacissimus, ac venalissimus, qui post vicef-
fies denos annos, solus immaculati Doctoris Ca-
tastrophën mortalibus inauditam prior om-
nium didicit à Patre mendacii. Erubescant
atrocissimi flagitii Proclamatores indignissimi
& affleclæ, & manum ori imponant. (*) *Ego*
verò neminem nomino, quare irasci mihi nemo
poterit, nisi qui antè, de se voluerit confiteri. O
SANTISSIME BENEDICTE ! Obstrue os lo-
quentium iniqua : Doctoris Sanctissimi insti-
tuens Apotheosin ; & omnis iniquitas opilabit
os suum. Id ipsum de Sanctissimi Nominis
JESU Bajulo Bernardino nostro Senensi, pari-
cum Doctore nostro causa de fama periclitante,
fecere Decessores tui. Tu quòque fac simili-
le de Bajulo MARIANI Candoris, quem si
SCOTUS non asseruisset, à negotio isto pe-
rambulante in tenebris tutus existeret. Ecce Fi-
lius tuus Pauper, & innocentissimus, PATER
BEATISSIME, Ecce Mater tua Purissima, &

Imma-

(*) Isai. 61. 3. (*) Tul. pro Leg. manil. num. 37.

71

Immaculatâ MARIA. Loquere, PATER MI,
Auriga Israel, & contremiscat Orbis.

Ad Doctrinam autem Castissimi Doctoris, unde digressi, ut revertamur; nescio qua juvenili formidine revincti, propugnare omisimus in proximè supradictò Asserto nonnulla ex operibus ipsius: putâ, Expositionem ejus, & Quæstiones in octo Libros de Physico auditu, & quatuor Meteorologicorum. Vanæ istius formidinis ea causa extitit potissimum, quòd ex nostris Criticis Opera ista SCOTO concedere subdubitent aliqui, ob apparentem aliqualem Doctrinæ incohærentiam; aliasque exigui planè, vel paucissimi momenti rationes. Rebus autem postea meliùs inspectis, perpensis prætereà momentis Clarissimorum Hibernorum P. Lucae Vvading. ac P. Bonaventuræ Baron, amplioribusque viribus utcumque resumptis ab defensione Operum D. THOMÆ, pari in nonnullis cum SCOTO hîc causa laborantis; etiam Opera ista cum cæteris SCOTI jam suprà recensitis Operibus consultò mihi defendenda coopto: in promptu habens, volente Deo Optimo Maximo, à similibus argutiarum implicamentis discutere me, qua facilitate potui furfuris ejusdem nonnullas Objectiones excitas contra Opera Angelici Præceptoris.

Verùm de Amplitudine Scholæ quid ? Sic latè per Orbem patet Ordo Seraphicus tuus, PATER BEATISSIME, ut Ipse totus in Ordinem Orbis videatur abiisse. At certè latiùs patet amplissima SCOTI dominatio Magistralis in Discipulos, Aseclasque Doctrinæ Suæ, quorum numerus in immensum succrevit. Et hinc Disciplinæ SCOTICÆ præstantia, hinc Doctrinæ commendatio, hinc tanti fama Doctoris effertur. Itaque Schola amplissima, ac pariter Illustrissima, à Magistro, à Disciplina, à Discipulis. Nulla ab initio creaturæ orta hæresis est, aut impietas, quam novus iste Ecclesiæ Catholicæ Alcides, se solo non debellet: nec aliter senserit, qui SCOTI disciplinam perdidicerit. Ita omnia dicta vegeta sunt, ita discussa omnia, ita omnia turgent, uti multoties ex dictis singulis dissertationes amplissimæ, profundissimæque cogi possint. Nihil in eo feriatum, tot penè Thesis distenditur, quot verbis, subsequens per omnia

Magnum Parentem Augustinum.

Proinde fit



ASSERTUM QUARTUM SCOTISTICUM.

*Doctrinam Subtilis Doctoris (ad
sensum Solidiorum Scotista-
rum) comprehendens
universam.*

ETIAM de SCOTO facili negotio prædi-
care posset Ecclesia, tot patrasse miracula,
quot Asserta constabilivit. Verum quod
miraculorum summum est, & caput; ipse
Totus, Miraculum prægrande est. Dogma
SCOTI Characteristicum de immunitate innocentis-
simæ DEIPARÆ ab originalis peccati macula, cernuis
vultibus adorat per momenta singula Ecclesia Dei to-
ta. Cætera omnia in omni fermè disciplinarum ge-
nere, stent aut cadant cum Scotistis; Istud autem Dog-
ma Princeps, cum Ecclesia Catholica in æternum sta-
bit. Sed & cætera stabunt omnia, firma, & immota;
Doctor enim Immaculatus, viam Dei in veritate do-
cet ubique; nec vel semel impingit, titubatve. Ergo
Duce Deo Optimo Maximo, SCOTO facem præfe-
ren-

rente, suffragante in omnibus, & consentiente Magno Parente Augustino, nullum à nobis defensum in errorem amodò spondemus, Castissimi Doctoris Subtilis Dogmata inconcussa, tutissimaque dum propugnaverimus, ad genuinam ejus mentem, nobiliorumque Scotistarum, tam Veterum, quàm Recentiorum, in Sacro Ordine Minorum sensum. Et *Primò* Dogmata Philosophica Ipsius, quàqua latissimè patent dispersa per Opera ejus omnia suprà recensita, defendenda amplectimur universa; sive ad *Logicam* ea pertineant, sive ad *Physicam*, sive ad *Animasticam*, sive ad *Ethicam*, sive ad *Politicam*, sive denique ad *Metaphysicam*. In omnibus istis Doctorem Subtilem absque ullo profus errore, seu falsitate scripsisse, affirmamus. Revocanda huc, quæ manent suprà dicta in Asserto Alexandrino de laudanda Neotericorum solertia. *Secundò*: Venio ad Dogmata Theologica Virginei, ac Mariani Doctoris, in suprà nominatis Operibus amplissimè contenta. Omnia ista, & singula, esse omnino verissima, immunissimaque ab omni prorsus errore, nedum Theologico, Doctrinali, seu Practico, sed etiam purè speculativo, enixè *asserimus*, ac *defendimus*; sive pertineant ad Theologiam, quam purè *Speculativam*, seu *Scholasticam* vocamus, sive ad *Asceticam*, seu *Mysticam*, sive ad *Polemico-Controversam*, sive ad *Exegeticam*, seu *Expositivam* Sacræ Veteris, ac Novi Testamenti Pagine, sive ad *Ethicam Sacram*, seu *Theologiam Moralem*, tam pro Foro *Poli*, quàm pro Foro *Fori*, Ecclesiastici,

ac Civilis. Omnia in supradictis SCOTI Theſibus
 appoſitè ſibi cohærent, & optimè conſtant, nullus
 Paralogiſmus, Antilogium inibi nullum. Omnia
 denique momenta, quibus Doct̃or MARIANUS
 firmat Aſſerta ſua, cùm Philoſophica, tum Theolo-
 gicà; aut aliorum Doct̃orum Aſſerta refellit; aut ob-
 ject̃a ſibi enodat, & extricat; optimè, dicimus, & ef-
 ficaciter firmare, refellere, atque enodare. Sicubi
 problematicus hæret Doct̃or; nos in utramque par-
 tem paramur, ad ſenſum clariorum, ac Sapientiſſimo-
 rum Scotiſtarum, putà: Joannis de Baſſolis, Joannis
 Canonici, Antonii Andrea Aragonii, Franciſci
 Mayroni, Hugonis de Novo-Caſtro, Antonii
 Trombetæ, Bonetti, Syrecti, Bargii, Petri Tatareti,
 Philippi Fabri, Franciſci de Pitigianis Aretini, Joan-
 nis Rada, Theodori Smiſing, Angeli Vulpes à
 Monte-piloſo, Franciſci Lycheti, Hugonis
 Cavelli, Antonii Hiquæi, Modeſti Ga-
 vatii Ferrarienſis, Laurentii Brancati,
 Mauriti de Portu, Joannis
 Pontii, Bartholomæi
 Maſtrii, &c.



ARTICULUS V.

Intimam, solidamque Concordiam
ostendit SCOTUM inter, ac Di-
vum THOMAM, ex Textibus
utriusque adductis, atque hinc
inde collatis : amborumque
Doctorum Concordiam
cum Magno Parente
AUGUSTINO.

VIDIMUS in duobus proximè præce-
dentibus Articulis, BEATISSIME
PATER, & Solem geminum, &
duplices se ostendere Thebas. Vidi-
mus, inquam, D. THOMAM, infixum Solis
instar splendidissimi in Vortice suo, stipatum
satellitibus suis, Thebas Ordinis Prædicatorum
clarissimas propiùs illustrantem ; atque inde
Ecclesiæ Dei toti, splendores suos longè, latè-
que diffundentem. Vidimus subinde Doctorem
SUBTILEM, Solis instar alterius, stantem iti-
dem

dem in Vortice suo, Minorum Stellarum Satellitio circumcinctum immenso; amplissimas Orbis Seraphici Thebas collustrantem; unde radios suos quaquaversus ejaculatur. Sic ergo invicem Doctorem utrumque conferimus, Solem geminum: uterque enim Sol, Vas admirabile, Opus excelsi. Quin etiam duplices Thebas sic sibi conferimus, Ordinem Utrumque Clarissimum, germanumque; quos uno effudit Partu Rebecca; utraque amplissima Civitas literarum, nec Altera alteri cedit.

Verum quis amplior Doctor, quærat aliquis, D. AQUINAS, an SCOTUS? Hic Frater Minor: Ille Major: nulla hîc simultas. *Capite nos.* Præstat equidem Hic, præstat & Ille, in Ordine quisque suo, coædicatus in Corpus Christi, in quo quidem omnia membra non eundem actum habent. *Atque ut à nostris, ad quos Philosophia postremò pervenit, exordiar* (ait Laudatus Joannes Picus Mirandulanus) *Est in JOANNE SCOTO vegetum quoddam, atque discussum: in THOMA solidum, & equabile.* Sic characteristicè, mea fanè sententia, Criticus Illustrissimus indigitat utrumque Doctorem. Habet itaque Divus THOMAS, primò, & characteristicè, *solidum* illud, & *equabile*, nec illa caret SCOTI subtilitate *vegeta*, atque

dis-

discussa. Habet & Hic, *vegetum suum, atque discussum*, primò quidem, & characteristicè; nec in Illo desideratur *solidum* illud Angelici Doctoris, & *aquabile*. Dixerim ergo, D. THOMAM ab Auditu præstare, nec tamen ea discutere negligit, quæ dicuntur, acie mentis acerrima præditus: à Visu autem SCOTUM præstare, qui suo illo aquilino intuitu, omnia pervadit, & scrutatur, arrectis quàmvis auribus, & apertis. Nunc ergo vicissim quæram & ego: Quis amplior sensus, Visus, an Auditus? Ad præscriptum Doctor uterque ministerium suum gloriòse implevit. Posuit Dominus terminos Eorum, qui à neutro potuerant præteriri. Plura post se piissimi laboris monumenta, Doctor reliquit uterque, quàm ferret ætas utrius; nisi virtute utrumque induisset ex alto, Dator ille munerum, qui *velle dat, & perficere pro bona voluntate*: unde meritò salutatur Uterque, Sapientiæ Dux, & Sapientium Emendator.

Ego Doctorem utrumque è proximo salutavi semel, & iterum; ab utroque nedum sto, sed & firmiter stabo; quemadmodum & ab utraque Clarissima Schola. Ambarum causa, & gratia insudo; nec quidquam præterea ex hac Doctorum Conciliatione mihi propono,

pono , quàm ut firmam , stabilemque statuat
erga Doctores Sanctissimos utriusque Scholæ
inter eorum Aseclas benevolentiam. Nihil in
D. THOMA Scotistam , nihil in SCOTO
Thomistam vellem lateret. Huc itaque colli-
mat totius laboris nostri Scopus ; hic & Ope-
ris finis est , & Operantis ; nimirum , ut ap-
proximatis quàm intimè sensis utriusque Doc-
toris , non quidem arbitrariè , non captiosè ,
non precariò ; sed conceptissimis verbis , Sen-
tentiisque adductis , collatis , quaquè fieri po-
tuerit soliditate discussis , cessent in posterum
contentiones illæ , ac lites , quibus Navis utra-
que non semel periclitabatur conteri.

(*) *Nè Pueri, nè tanta animis assuescite Bella;
Nè Patriæ validas in viscera vertite vires.*

Hoc velit Ecclesia Catholica. Hoc velint Or-
dinis utriusque Fundatores Sanctissimi, DOMI-
NICUS , ac FRANCISCUS : hoc ipsum Cla-
rissimi Doctores, THOMAS , & SCOTUS,
quorum intuentes () exitum conversationis, Filii,*
Discipulique , imitamini fidem , emulamini
Charismata meliora , humilitatem, modestiam,
pacem, atque in amore fraternitatis Charita-
tem ; quæ plenitudo Legis est. () Si invicem*

(*) Virg. *Æn.* 6. (*) Heb. 13. 7. (*) Galat. 5. 15.

mor-

mordetis, & comeditis ; videte nè ab invicem consumamini.

Hoc Itachus velit , & magno mercentur Atridae.

De cætero, PATER BEATISSIME, tantum abest, ut hinc velitationes Scholæ, cujus libertati apertè faves, consopire cupiam, aut velim; ut ex hac potiùs Conciliatione, novas prævideam exorituras : dum Thomista contenderit, SCOTUM à se omnino stare, & vicissim Scotista, à suis stare D. THOMAM. Sanè jam pridem ante me, idipsum perficere conati sunt ex nostris Cardinalis Sarnanus, ac Pater Baudunius Capuccinus; qui tamen in plerisque arbitrariè procedunt, atque in nonnullis deficiunt, ac succumbunt. Plùs arrideret intentum Decessoris tui Sixti IV. si tamen absolvisset, de quo subdubito; qui dum ageret in Minoribus, Opus aggressus est arduum, (Teste Vvadingo de Scriptoris Ordinis) quo contendebat ostendere, D. THOMAM, ac SCOTUM convenire Sententiis, etsi verbis differant. Hoc ipsum meditamur & nos, Deoque volente absolvemus, speciali volumine desuper edendo. Res est profectò non adeò facilis, Opera universa utriusque Doctoris perlegendo conferre, relegere collata, omnia hinc inde perpendendo

discu-


discutere, atque uno veluti intuitu præ oculis habere; sic facilius, ni multum fallor, mens utriusque, sensusque capeffendus est; quàm si Commentatorum, ac Sectatorum utcumque sagacium, & illustrium sententiis quis identidem subsistere velit. Ego id mihi prius faciendum judicavi, nec minore instructus supellectile accedere auderem, Crisin Theologicam, ac simul Philosophicam instituturus, de Summorum Scholæ Principum Operibus. Non ergo crimini nobis à quoquam vertendum, sive Scotista ille sit, sive Thomista, inter duas Acies nunc demum prosilire, sensumque nostrum in medium proferre; posteaquam utriusque Clarissimi Doctoris Opera, Axiomata, Problemata, Momenta, probantia, improbantia, diluentia, semel, & iterum propugnauerimus, ad sensum, hinc Scotistarum, atque Thomistarum inde. Sub umbram igitur amplissimam, potentissimamque Sanctitatis Tuæ, PATER OPTIME, confugio, libertatem istam appellans.

Ultrò equidem, in gratiam utriusque Scholæ Clarissimæ, fatebor dissidium intercedere probabilissimum, SCOTUM inter, ac D. THOMAM; & quidem in plurimis, quorum recensitio hinc nimis esset onerosa. Hujus sanè dissensionis ea ratio potissima existit, quam paulò superius

perius attigimus ; quòd nimirum nemo, quem sciverim, utriusque Doctoris ex æquo contulerit Opera , libraveritque in pondere debito, ac statera ; quatenus amborum scopum , methodum, placita , ac momenta, omnia simul adducta ante oculos , collata, discussa, ac perfecta haberet. Audeo insuper addere ; nec Scotum Ipsum Opera Omnia Angelici Doctoris ita præ manibus habuisse , eo quo nunc ordine circumferuntur, castigata , correctæ, atque in unum lucidissimum, completissimum, ordinatissimumque Systema coacta. Notissima sanè res est , quanta Librorum caritate , ac penuria laboraverint Patres nostri, ante Artis Typographicæ adinventionem ; unde non mirum, si habita ratione paupertatis Evangelicæ, cujus extitit observantissimus Doctor MARIANUS, præclara nonnulla Angelici Doctoris Opuscula non vidisset, quæ temporibus illis ipsum latuerant Clarissimum Ordinem Prædicatorum. Vidisset SCOTUS Summam utramque D. THOMÆ, vidisset & aliud unum, alterumve Opusculum. At planè Principia, ac Momenta Thomistica latius adhuc patent : Quique aliter senserit, profectò enormiter aberrat.

Nolim ergo mihi succenseant , si postquam additissima quæque exploraverim Doc-

toris utriusque Clarissimi, novam eruderare
 semitam incepero, qua citius, planiusque pa-
 teat pacificus aditus in penitissimos amborum
 Montium recessus. Summo mihi sanè piaculo
 vertendum esset, Montes hosce coagulatos to-
 tiès lustravisse; si domum vacuus remearem,
 nihil referens pretio dignum, aut scitu; eo
 vel maximè, cùm inde Pueruli Tyrones, qui
 ultra crepidinem non audent, nec juga supe-
 rare valent, dietim onerati revertuntur The-
 sauro desiderabili super aurum, & lapidem
 pretiosum multum. Quo autem tutiore gres-
 su incedam, ac firmiore, Magnum Parentem
 AUGUSTINUM nullibi dimittam; quem nec
 dimittere ausi sunt Duces mei Clarissimi, ac
 Præceptores, THOMAS, & SCOTUS. Pro-
 inde ostenso prius inter Hosce, quod interest,
 indivulso fœdere, ac in perpetuum duraturo
 firmissimæ pacis vinculo; ostendam & am-
 borum cum eodem Sanctissimo Pa-
 rente AUGUSTINO impertur-
 babilem omnino Concor-
 diam. Sit itaque



ASSERTUM QUINTUM CONCORDIARUM.

*Universalem propugnans mentis Unitatem Scotum inter,
ac D. Thomam.*

ITA in plerisque Scotistæ dissentiunt à Thomistis, ut quæquæ patent amplissima Philosophiæ sæcularis camporum patentium æquora, ac maris Magni Sacræ Theologiæ immensa spacia; ubique penè, ac semper velitari non desinant, ac præliari. Terra, marique bella, horrida bella. Verùm inter Duces, nec geritur bellum, neque jurgium, neque contentio interest, sed Pax longissima, & segura Quies; nolentes, mea sententia, vocari piures Magistri, scientes profectò, quoniam unus est Magister Eorum, & omnium Christus JESUS Princeps pacis. Nos proinde, pacis Principi, pacificisque Ducibus sub Vexillis ejus emeritis, obsequium præstaturi, *affirmamus, ac defendimus*. Doctorem Subtilem in nullo prorsus Doct. Angelico contrariari, in Philosophicis, aut in Theologicis. Ac *primò*, in Dogmatibus Philosophicis: per omnia sibi consentiunt, in nullo dissentientes.

res, SCOTUS, ac D. AQUINAS; five agant in Logicis, five in Libris Physicorum, five super Libros de Anima, five in Ethicis, Politicis, five denique in Metaphysicis. Proferentur in medium, & conferentur Textus, Sententiæ, Verbaque amborum, atque iis in iisdemmet insitam patefaciemus Concordiam; aut nullam inesse discordiam ostendemus, quæ ad summum planè verbalis non sit à quoquam agnoscenda. *Secundò*: in Theologicis. Hic vellem obaudirentur potius exhortationes Ducum, quàm ululatus Exercitus. In hisce enim multoties, & plerumque auditur, confusæ sonus Urbis, & illætabile murmur. In illis autem, si è propinquo audiantur, concinnitas, lucidus Ordo, dignitas modestissima, splendor varius illuminans, ac latificans attenditur. Unde *asserendo* dicimus: Doctorem Subtilem in nullo Placito suo Theologico, à D. Thoma dissentire; nè *ibi quidem, ubi Angelico Doctore in faciem resistere videtur, ac pro viribus impugnare*: five Disceptatio sit de iis, quæ ad Theologiam merè *Scholasticam*, seu *Speculativam* attinent, five ad *Mysticam*, five ad *Exegeticam*, seu *Expositivam*, five ad *Polemicam*, five denique ad *Moralem*, & quidem tam pro foro interno, quàm utroque externo, *Ecclesiastico*, ac *Civili*. Tandem *asserimus*: D. THOMAM, ac SCOTUM, quemadmodum in nullo sibi contrariantur; ita nec in minimo desciscere à Magno Parente Aurelio AUGUSTINO.

NOVA AUTHORIS PROTESTATIO,
Prævia ad Defensionem Librorum Mysticæ
Civitatis Dei.

N Eminem latere arbitror studium Opti-
mi Pontificis, Sanctissimi Patris Nostri BENEDICTI XIV. in duplici
promovenda Causa, tum Beatificationis, & Canonizationis Vener. Servæ
Dei, Sororis MARLÆ à JESU de ACRED A,
tum approbationis Operis Mystica Civitas Dei
inscripti. Id totum nuperrimè innotuit per Apostolicas Literas, ab Eodem Sanctissimo desuper
emanatas, datas Romæ apud Sanctam Mariam
Majorem die 16. Januarii, anno proximè elapso
1748. addito Decreto S. C. habitæ coram Sancti-
tate Sua, de vero Authore prædicti Operis, die 5.
Decembris anni 1747. Ipsum autem Decretum,
de Consilio ejusdem Sacræ Congregationis, &
unanimes consensu, jussu autem Sanctissimi edi-
tum, sequentis tenoris est: nempe: Ex hactenus
deductis non constare, prout oportet, in
casu, & ad effectum, de quo agitur, quòd
Opus inscriptum *Mystica Città de Dio*, sit
Opus Ven. Servæ Dei Sororis MARLÆ à JESU
de AGREDA; ex gratia tamen speciali Postu-
latoribus indulgeri, ut in Causa Beatificatio-
nis,

nis, & Canonizationis ejusdem, ad ulteriora procedatur, & c. Nos propterea, Decreto prædicto Sacre Congregationis, edito, prudentissimè quidem, jussu Sanctissimi, morem gerere minimè refragamur. Hinc subscribentes libentissimè, fatemur, ex hæcenus deductis non constare, prout oportet, in casu, & ad effectum, de quo agitur, quòd Opus inscriptum *Mystica Città di Dio*, ut præfertur, sit Opus Ven. Servæ Dei Sororis MARIE à JESU d. AGREDA. In dicendis itaque duobus sequentibus Articulis, nihil vel minimum, antedicto Decreto detractum iri protestamur. Nos enim Authoritati, & probationibus ordinis omnino inferioris innitimur, traditioni nimirum constantissima, tot annorum serie comprobata, dictis præterea, & unanimi sensu Summorum Theologorum Ordinis nostri totius, aliorumque bene multorum, quibus Theodidactæ Scriptricis, dum in humanis ageret, Sanctitas Eximia notissima fuit, uno ore conclamantium; Opus illud *Mysticæ Civitatis Dei*, Spiritus Sancti ductu, ac procul omni alia quacumque ope humana, propria Ipsius Sacre Virginis manu fuisse conscriptum.

Porro protestationem hanc novam, novi occasione Decreti præmittimus, non tantùm propter iram, ut loquitur Apostolus, sed etiam propter
conf.

conscientiam. *Etenim Sanctionibus Apostolicis, quarum nulla prodit, nisi post summè maturam, prudentissimamque judicii discussionem, repugnare, quasi peccatum ariolandi est, & quasi scelus idololatriæ nolle acquiescere. (*) Hinc monitum te vellem, Lector, quicumque demum sis, quantumvis sapiens, & callidus tibi esse videaris; nè audeas contra Petri Cathedram erigere cristas; aut extento collo currere contrà; nisi sedere pratuleris in Cathedra pestilentiae. Prophanus es, ait D. Hieronymus, si id feceris; nam qui cum Petro, ac Petri Successore non colligit, scito, quoniam certissimè dispergit. Audiant ista verissima omnes, cujuscumque status sint, aut conditionis. Quòd si præeminent, precedant plebem exemplo obedientiae promptissimæ; Eique, qui primus est in Apostolica Dignitate, ac dominica Confessione, pareant illico, & incunctanter. Fides tua deficere potest; fides Petri deficere non potest: non enim pro te, sed pro Petro rogavit Dominus, ut non deficiat fides ejus; Eique aliquando converso, munus fratrum suorum confirmandi commisit. Hanc doctrinam de Cælo allatam, accepimus: (*) Quòd si Angelus de Cælo contrà prædicaverit, Anathema sit.*

(*) Reg. 15. 23. (*) Gal. 18. 4.

ARTICULUS VI.

Myſtica Civitas Dei, Hiſtoria Di-
vina de Cœlo delapſa, in ſubſidium
Eccleſiæ Militantis, ac lætificans
pariter Solatium; Acta Sacratiffi-
mæ Deiparæ Virginis **MARIÆ**
Reginæ Noſtræ, omniumque Crea-
turarum adumbrans; à Candidiffi-
ma, ac Theodidacta Virgine Sorore
MARIA à **JESU** de **AGREDA**,
Virginis Deiparæ Apocriſaria ſecre-
tiſſima, ſtylo fideli conſcripta, &
probatur, & aſſeritur, & vindi-
catur in omnibus.

HACTENUS, BEATISSIME PATER, de
Scholæ Clariffimis Antefignanis, **ALE-**
XANDRO, **THOMA**, **BONAVENTURA**, ac **SCOTO**, quorum Opera, Doctrina,
M
nam,

nam, Principia, breviter adumbravimus, ac Momenta. De Candidæ nunc, ac Theodidactæ Virginis MARLÆ à JESU de AGREDA Operibus, sub titulo *Mysticæ Civitatis Dei*, disserendum aliquantisper. Sanè Quatuor illi Doctores Summi, proximè laudati, quantumvis in Schola Orationis eruditi, utut à Domino fuerint edocti; nemo tamen eorum extitit, qui Aulas humanarum disciplinarum attingens, à Magistro aliqua non didicerit humano. Res autem hic longè aliter, & omnino se habet. Quæritur enim, quomodo HÆC literas scit, cum non didicerit? Quis Virgini simplicissimæ Clavem scientiæ tradidit? Quis linguam concessit eruditam? Is Ipse nimirum, nec alius ab Eo, cujus cum simplicibus sermocinatio: Qui toties aperuit os mutum, & linguas Infantium fecit disertas. Exclamem ergo hic liceat, cum Magno Papa Leone: (*) *O quàm velox est Sermo Sapientiæ! Et ubi Deus Magister est, quàm cito discitur, quod docetur! Non est adhibita interpretatio ad audiendum, non consuetudo ad usum, non tempus ad studium: sed spirante ubi voluit Spiritu Veritatis, propriæ singulorum Theologorum voces, factæ sunt in hujus Virginis ore communes.*

(*) Ser. I. de Pent. cap. I.

Cæteri ergo Doctores laboraverunt, copiose quidem, dilucidè, gloriosè: Hanc in labores eorum introisse dicerem, nisi immissa potius, ac in partem laboris adsumpta videretur. Nolite itaque loqui sublimia gloriantes Critici; Deus Scientiarum loquutus est ad Cor Sponsæ suæ ductæ in desertum; affectum inflammavit; illuminavit intellectum; ut enarraret mirabilia dilectissimæ MATRIS Suæ, ac Purissimæ; quam sibi elegit ante Mundi constitutionem, in splendoribus Sanctorum, & ante Luciferum; ut esset Sancta, Impolluta, Innocens, Immaculata, segregata à Peccatoribus, & excelsior Cœlis facta. Hæc autem quare fecerit, quis vestrum audeat Eum interrogare? Non sint oculi vestri nequam, quia Ille Bonus est. Ubi sapiens inter vos, qui divinæ huic Historiæ detrahare audeat? Ubi scriba? Nonne stulta Mundi elegit Deus, ut confundat sapientes? Audite, & contremiscite ad verba Pauli: *Quod stultum est Dei, sapientius est hominibus: & quod infirmum est Dei, fortius est hominibus.* An non perdidit sapientiam sapientium, & prudentiam prudentium reprobavit, cum ad simplicem Piscatorem, & ignarum, avarum adjunxit Publicanum; ut Ethnicis simul, ac Publicanis, justis pariter, & injustis, sapientibus,

tibus, & insipientibus, novitatem patefaceret omnium novitatum maximam, Filii sui, inquam, in Carne dispensationem?

Sanè præter ea, quæ scripta sunt, & alia plurima patravit Dominus JESUS, quæ scripta si fuissent, dilectus arbitratur Evangelista Discipulus Mundum totum ad capiendum Libros non suffecisse. Et meritò quidem id ratus est Castissimus Joannes. Quis enim dicta Domini JESU, quis facta, quis cogitata, ab instanti Conceptionis ejus, in Aula Uteri Virginalis, scribendo edisserat? Tota simul, & Hominum, & Angelorum Collectio, ista ad scribenda non sufficeret; & scripta Mundus quomodo contineret, aut caperet? Agnoscite modò Matris Filii Dei Vivi dignitatem, quadamtenus infinitam; si tamen perpenditis, ô miseri Criticelli, Ipsius Filii dignitatem, non propè infinitam, sed infinitissimam. In Virgine fatetur Hieronymus, fatentur & Patres universi, fatetur Schola, Catholica fatetur Ecclesia, omnem sese infudisse plenitudinem gratiæ, quæ in Christo est, quamquàm aliter. Id ipsum & vos fateminor, agnoscetes Hevam novam Matrem Vitæ, Novi Adami de Cælo Cœlestis Genitricem, Gerulam, Nutricem, Altricem, Adjutorium factum Filio Dei simile sibi, Me-

diatricem potentissimam, & Mater nostri afflicti Corredemptricem. 93

Itaque nolite mirari, si plurima Beatissimæ Genitricis Sacramenta latuerint, & facta, pro Filii sui beneplacito, statuto tempore, & congruo, ad Ecclesiæ solatium revelanda. Quòd si placuit, novissimè diebus istis, paucula hæc per Ancillam suam, Ecclesiæ Sponsæ suæ revelare; scitote, quoniam plura restant ineffabilia, de Gloriosa Deipara, in diem Æternitatis, amoto velamine, revelanda. (*) Si aperto Templo Dei in Cœlo, & visa (de foris tantum, & extrinsecus) Arca Testamenti ejus in Templo ejus, facta sunt fulgura, & voces, & tremotus, & grando magna; dicite, filii hominum imbecilli, quæ fierent, si Arca Deifera, omnibus lapidibus pretiosissimis Charismatum Spiritus Sancti, auro mundissimo inserta, aperta inspiceretur?

Ergo quandoquidem consistimus ad Portas Mysticæ Civitatis Dei Nostri, Quam, per simplicissimæ Virginis ministerium, Ipse fundavit Altissimus; solvite, Critici imbelles, & carnales, calceamenta terrenarum affectionum de pedibus vestris; terra enim HÆC, in qua statis, terra Sancta est, nec unquam patuit maledicto. Accedite cauti, ac reverentes, ad videndam

(*) Apoc. II. 19. visio.

visionem *Libri Magnam*; prosternite vos, & adorare: Rubus ardet, neque consumitur. Civitas Hæc fidelis neque lustrari veretur, neque inspicere; nihil enim coinquinatum ingressum est in Ea; foris Canes, & venefici; nec expugnari timet; Deus enim in medio ejus, non commovebitur. Quis vestrum cognovit sensum Domini de Sacratissima Matre sua? Aut quis ex vobis Consiliarius Ejus fuit, ut Eam tantumdem, nec amplius citare debuisset?

Equidem in *Libris Mystica Civitatis Dei*, Acta Vitæ Sacratissimæ Deiparæ evolventibus, nil novum reperire est, nisi novum reputaverit quispiam, antiqua dilucidè, ac noviter evoluta, & explicata videre. Id agnovere jam pridem, & quotidie agnoscunt, Critici sinceri, ac præclari, omnis Ordinis, Viri doctissimi, Regulares, ac Sæculares, pietate præditi solida, ac virili; qui tamen, non inter pocula, & fercula; non arrogantia spiritum tumido, & inflato; sed in spiritu humilitatis, & in animo contrito legerunt. Ego meritò plurimum suspicio, veneror, ac dilaudo Theologos eos, quoscunque, qui, sive id jussi fecerunt, ut Theologi Sacrae Congregationis, sive sponte sua, zelo veritatis adducti, Crisin de *Libris* istis palàm instituerunt, nervosè, ac viriliter,

sobriè tamen , sincerè , ac modestè : Hoc enim à Theologis expetendum , juxta præceptum Apostoli : *Omnia probate , quod bonum est , tenete* : nec Libri *Mysticæ Civitatis Dei* , sic discuti detrectant , & examinari. Verùm quis probare possit petulantiam sciorum quorundam , qui zelum obtendentes finè scientia , invidiam totiès Operibus istis paraverunt , veritate turpissimè relicta ? In omnibus istis deprehendimus vel crassissimam rei Theologicæ imperitiam ; vel acerbiter animi , ac diabolicæ invidiæ livorem ; vel tumorem stolidæ arrogantiae ; vel denique , quod pessimum , ac stigma reprobationis , pravum in suavissimam Deiparam affectum. Væ animabus eorum , quoniam invenient eos mala , nisi resipiscant.

Sanè nil fermè pro , aut contra Libros *Mysticæ Civitatis Dei* scriptum est , à prima eorum editione usque in præsens , quod nos lateat : objectiones tantùm excipio Theologorum Sacrae Congregationis , quas non vidi. Nec quod plùs stomachari faciat offendimus , sicut tumultuariæ factionis Parisiensis attentatum ; quia omnino illegale , præceptum , temerarium , improbum , Dignitati Primæ Sedis sacrilegè injurium , Schismaticum proinde , ac hæreticale. Processum vidimus ; qui totus Spiritu schif-

schismatico confectus, ac pertinacia hæreticali infectus apparet; ut latè, ac solidè probant Illustrissimus Dominus de Leyba, & ex nostris, Reverendissimus Feijoo, in Catholico Præsidio *Mystica Civitatis Dei*. Verùm censuram hanc dimittamus; quæ millies refutata est, ac damnata à Summis hìc in Hispania Magistris. Offendit etiam hìc Dominus *Amort*, vir alioqui de Republica literaria bene meritus. Nec propterea offendit, quòd crisin instituerit, id enim expetimus, tantum abest ut refugere velimus; sed quòd oscitanter instituerit, & insincerè, & contra regulas critices traditas à semetipso. Quòd si stylum pretio locavit dicens: *Quid mihi vultis dare, & Ego eam vobis tradam?* (Id enim non pauci perhibent) delatura hæc Civitatis, abominabilis est coram Deo, & hominibus, quantumvis in incassum ceciderit. Sed plenè detecta est hæc ejus oscitantia, vel mala fides, à R. P. Gonzalez Matthæo, qui mensuram ei plenam, ac supereffluentem in sinum reddidit: & hunc itaque dimittamus.

Impegit pariter larvatus *Lampridius*; non quòd quidquam directè scripserit, quod sciam, contra Venerabilis Virginis AGREDENSIS Libros; sed quòd ausu planè temerario, impio,

ac sacrilego in MATREM DOMINI, Purissi-⁹⁷
mam, & Immaculatam, impetiverit; & qui-
dem plùs fatìs apertè (en hominis incogitantis
audaciam) subdolè, vafre, & captiosè. Domine
Lampridi, falcem tuam injussus, mala quidem
avi, in messem injecisti alienam. *Nihil est oper-
tum, quod non revelabitur, & occultum, quod
non scietur.* Tu in occulto hæc fecisti; ego au-
tem palàm loquor Mundo, & in conspectu So-
lis hujus, nec quidquam loquar in occulto. Vi-
di millies damnabilem Libellum tuum de *su-
perstitione vitanda*, qui ignibus, & flammis com-
buri meretur. Nescis profectò quid supersti-
tionem interfit, ac Religionem: contremisce ad
verba Isaïæ: *Vae qui dicitis malum bonum, &
bonum malum.* Noverint propterea universi,
quoniam Theologus non es, nec fuisti, nec eris.
Bene audis, ut perhibent, apud heterodoxos An-
glos, ac Batavos, qui, à veritate quidem audi-
tum avertunt, ad fabulas autem convertuntur;
sed mallem bene audires apud Sedem Apostoli-
cam, quæ cum Petri primatu depositum cus-
todit immaculatæ doctrinæ, & veritatis, quæ
justificat impios. Sta quæso in gradu tuo, &
conticesce. Opus assumpsisti, illud perface.
Tractent fabrilia Fabri. Hanc itaque Sacræ
Theologiæ Provinciam, in qua peregrinus es,

& advena, Theologis dimitte. *Virga in dorso ejus, qui indiget sapientia.* Peccatum agnosce territorii violati. Resipisce. Age poenitentiam; percutite, ac repercutite foemora tua. Sed quoniam jam amplas dedisti poenas anno superiore 1747. Ven. Viro Fratri Dominico à Sancto Petro de Alcantara, Emerito Sacrae Theologiae Lectori, Provinciae Reformatae S. Gabrielis, Ordinis nostri, qui Libellum tuum infamem funditus evertit, ac refutavit; Ego ad scopum meum regrediens, te dimitto: cave autem, nè iterum de hac re audeas musitare. Pro afferenda gloria Immunitatis dilectissimae Matris suae à spurcitia originalis peccati, filii hominum si obmutescerent, spiraculum vitae, loquelam, & intellectum lapidibus infunderet istis Omnipotentissimus Filius ejus. Sed surrexerunt Filii ejus, & Beatissimam praedicaverunt; Beatam Eam dicunt omnes generationes: etiam Mahometani, naturali lumine ducti, Immaculatam efferunt; quod nec ipsimet Pseudoprophetae suo concedunt.

Historiam porrò quod attinet *Mystica Civitatis Dei*; pro ejus fide, ac veritate, steterunt in confractione, praeter Theologos Ordinis Seraphici, totius Orbis Christiani Viri doctissimi, pientissimique. Probavere Universitates amplif-

simæ, ac florentissimæ, Salmantina, Complutensis, Tolosana, Lovaniensis, ac Perpiniana. Probavere, ex Ordinibus Monachalibus, clarissimi inter alumnos Mag. P. Basilii Doctores. Filii pariter Sanctissimi Protectoris nostri in Cœlestibus, Maximi Doctoris D. Hieronymi. Canonici Regulares Magni Parentis Augustini. Benedictini clarissimi probavere plurimi, ac Cistercienses. Probant prætereà Præmostratenses. Probant, dum assidue, ac jugiter legunt, ac meditantur, Sanctissimi Ascetæ Carthusienses. De Ordinibus autem Mendicantibus quid? Omnes, & singuli Opus suum in propugnanda *Mystica Civitate Dei* egregiè contulere. Dominicani plures, iiq̃ue Viri doctissimi: Augustiniani Eremitæ Calceati, ac Recollecti: Carmelitæ Observantes, ac Reformati: Captivorum Redemptores Trinitarii, ac Mercenarii, Calceati, & Excalceati: ex Ordine Minimorum Sancti Francisci de Paula Theologi Summi: Jesuitæ doctissimi longo ordine: Clerici Regulares, ac Sæculares: quos omnes nominatim adductos, latè prosequitur, & honorificè Ven. P. Fr. Paulus de Ezija Capuccinus, in egregio Volumine suo, titulo, *Inexpugnabilis Muri Mystica Civitatis Dei*, inscripto. Hos inter, nedum Panegyristæ extitere eximii, sed & Apologistæ acerrimi.

rimi. Testis Eminentissimus Benedictinus Cardinalis de Aguirre, cujus tamen Apologiam non vidi. Testes bini Carmelitæ doctissimi, Lumbier, & Garcia de Castilla. Testis, & Suavissimæ Virginis de Mercede Redemptionis Captivorum alumnus, doctissimus P. Cabero. Insuper & longo 14. annorum spatio discutere, & probavere Theologi Supremæ, ac Generalis Inquisitionis Hispanæ, omnes Viri integerrimæ fidei, ac doctissimi.

Plurimus essem in recensendo Infultos Illustrissimos, pietate eximia, ac doctrina præclaros, qui, sive ex sacro suggestu, sive in scriptis suis, hujus Theodidactæ Virginis doctrinam fidelibus Populis, sapientibus, & insipientibus, tradere non dubitaverunt. Testis ille nobilis, ac strenuus Evangelii Præco, Illustrissimus Dominus Barcia, Episcopus Gadicensis. Testis & Illustrissimus Dominus Siuri Cordubensis Episcopus, in Voluminibus Egregiis. Testis prætereà in sermonibus suis omnium Maximus, Sanctissimus Decessor tuus, PATER BEATISSIME, Benedictus XIII. cujus sanctitatis eximiæ, doctrinæ, ac virtutum laudes, solus exæquare poterat Stylus ille Tuus, planè Aureus, quem conflavit Aristoteles, Tullius expolivit.

Ego verò libenter alios prætereo Viros,
pieta-

pietate , ac doctrina ampliffimos , cùm S.R.E. Purpuratos Eminentiffimos , tum Sanctiffimos Deceffores tuos, Sacræ huic Virgini piè faventes , & caufæ , tum Librorum *Mysticæ Civitatis*, tum Beatificationis , & Canonizationis Ejusdem Ancillæ Dei ; quò citiùs ad ea deveniam , plurima quidem , & præclara , quæ in hanc utramque Caufam collata funt , cura , ftudio , ac follicitudine verè paterna Sanctitatis Tuæ , PATER OPTIME , ac SANTISSIME. Summæ enimverò ingratitudinis meritò coarguendus eflèm , fi ifta , obiter saltèm , commemorare , vel leviter attingere , prætermitterem ; ea enim omnia fi recenferem , huc transcribendæ forent de verbo ad verbum , ipfæ Literæ Apostolicæ Sanctitatis tuæ defuper emanatæ , ac datæ Romæ apud Sanctam Mariam Majorem , die 16. Januarii , anno fuperiore 1748. Hæc omnia gratanter , animoque gratiffimo agnofcit Ordo Minorum totus , quaquà patet ; prout in annotatiunculis fuis , ad earundem literarum calcem appofitis , fatetur R.^{mus} P.^r N.^r Fr. Raphael à Lugagnano , Generalis Ordinis Minifter , ad quem pro Ordine toto directæ funt.

Nemo profectò Sanctiffimorum Decefforum tuorum Pontificum , quantùmvis benè
affec-

affectus in utramque Causam hanc, tantum-
 dem in toto Vitæ suæ decursu præstitit; quan-
 tum Ipse præstitisti, PATER BEATISSIME,
 in die illa una, qua eandem ê tot difficulta-
 tum implicamentis emergere iussisti; omnibus
 ut ê medio sublatis, deinceps expeditè decur-
 rat, & aurâ secunda. Ipsæ legerentur vellem
 Literæ illæ, quæ utriusque Causæ hujus statum,
 ab initio usque modò, aperiunt, & prose-
 quuntur, ita methodicè, ordinatè, copiosè,
 explicatè, ac dilucidè, ut ultra nil absolutius,
 adeòque ad Regulas exactum, desiderari pos-
 sit. Verùm istis ego quid immoror? Methodus
 ista nova non est, quæ cohæret, & ubique si-
 bi constat per universa Volumina tua, omni
 laude dignissima; in quibus quid cuique præ-
 tet, ubi præstantissima sunt omnia, non faci-
 lè dixerim. Testor Deum Omnipotentem; ita
 me censere de scriptis tuis, millies OPTIME
 PONTIFEX, Doctissime, Eruditissime. Sed
 gnarus expenderit Lector singula dicta sequen-
 tia, ex prælaudatis literis adducta §. *Penden-
 te Causa*, in fine.

*Persuasum autem tibi (Ministro scilicet
 Generali) esse volumus, Nos, hac concessionis
 amplitudine, ultra servatos à Prædecessoribus
 nostris fines longè progressos esse, propter piam
 affectio-*

affectionem, quam erga Ancillam Dei meritò fovemus, teque etiam intelligere, dum præfatum dubium de illius Virtutibus in specie, non nisi post ejusdem Operum approbationem absolvi volumus, magnam à Nobis utilitatem afferri illius Causæ, quæ, scilicet, ex ipsis Operibus, si approbata fuerint, majorem procul dubio splendorem accipiet. Ita est enimverò, PATER BEATISSIME, ea enim Concessiois amplitudine, qua nulla major esse potest, maximam Causæ utilitatem attulisti; Probationes faciliè deducuntur, ut spero; unde Causa maximum absdubio splendorem accipiet, quem tamen Sanctitati Tuæ referet acceptum. Et paulò infra: Hoc eodem temporis decursu, Nos ipsi omnem diligentiam adhibere non omittemus, ad hoc ut, si aliquando probatum fuerit, Mysticam Civitatem Dei à Ven. MARIA à JESU verè compositam fuisse, tum demum, vita comite (comitetur utinam ultra dies Petri, & longissimè in Ævum, PATER OPTIME) Judicium nostrum proferre valeamus: an Liber ipse contineat errores contra Fidem, vel bonos mores, vel Doctrinam novam, vel peregrinam, atque à communi sensu Ecclesiæ, & consuetudine alienam, juxta relatum superius Urbani Prædecessoris Decretum. *Quamobrem*

obrem mandavimus etiam singulis Cardinalibus, atque Theologis peculiarem Congregationem à Nobis, ut *suprà*, deputatam constituentibus, ut unusquisque suam hac de re Sententiam Scripto conceptam, suoque sigillo obsignatam, in manus nostras remittant; volentes omnia hujusmodi Judicii capita in antecessum per Nosmetipsos debita maturitate, unà cum Judiciis Academicarum Salmanticensis, Complutensis, Lovaniensis, ac Tolosanae pensare. Cedant omnia feliciter, Sanctitate Tua Clarum Ecclesiæ, fospitate diuturna, moderante. De quatuor autem Universitatibus Illustrissimis, merito Pietatis, ac Doctrinæ florentissimis, *Mystica Civitas Dei* approbationem jam pridem promerita est, & iterum promerebitur absdubio ampliorem.

Sanè quæstionem illam de authentica certitudine Authoris MYSTICÆ CIVITATIS DEI, prout oportet, in casu, & ad effectum, de quo agitur, non ad Theologos, sed ad Jurisperitos pertinet probare; unde abstrahens, isti nolo quæstioni immisceri. Ultrò autem aggredior, ac libenter, alteram eam quæstionem, quæ ad Caput regreditur, de qualitate Doctrinæ. Hanc pro tuendo paratus sum, si Causa tamen ita postulaverit, nedum prædic-
tis

tis Quatuor Illustrissimis Academiis memetipsum sistere, verum & cæteris totius Orbis Christiani Universitatibus; Doctorum omnium objectiones, reverentia omni, ut par est, & oportet, repetere, ac solutionibus ineluctabilibus enodare, ad præscriptum Asserti paulò infrà statuendi. Verum id opus non fuerit. Sacram Facultatem Sorbonicam operior; Opera ista Parisiis in oculis omnium Doctorum Clarissimæ ejusdem Sacræ Facultatis defendere paratus sum, ab omni nævo falsitatis, per singula incisa, ac de verbo ad verbum. Eò sanè libentiùs id facerem, quòd certissimè sciam, Censuram illam famosam, invito longè majore, juxta ac saniore Doctorum numero, à Janseniana invalente factione, quæ jam extincta concidit, aut agit animam, prodiisse. Id ergo fecit temporum illorum calamitas, ut fieret contradictio potentior; atroci Hispaniam inter, Galliamque gliscente Bello, extincto pariter Archiepiscopo Parisiensi, Acer-rimo Jansenisticæ factionis Hoste.

Nec tamen bona fide fecisse gloriari poterat Factio cæca, proles vesana Gigantum; stetit enim in confractione Vir amplissima Doctrina, ac pietate præstans Dominus Feurier, qui diffusa oratione, ac terribili, tot ful-

fulminibus, quot Sententiis, adversarios heterodoxos oppressit. Huic eidem Clarissimo Viro obsecundare non destiterunt alii ex Senioribus quadraginta numero, & amplius, qui illam ipsam Deputatorum Sententiam, acerrima confixerunt censura, excerptasque è Libro Ven. Matris propositiones, Catholicas, & pias esse, ex Scriptura, Conciliis, Patribus, ac Theologis Scholasticis, Polemicis, Asceticis, demonstrarunt. Quæ cum ita sint, sanè Doctrina *Mystica Civitatis*, ab omni erroris, ac periculose novitatis suspicione immunis esse probata est, jampridem, & multoties ante me, à Viris doctissimis omnis Ordinis, de quorum Magisterio mihi meritò gloriandum esset.

Dicta porro tantorum Virorum universa, paucis quidem, turgescuntibus tamen verbis, circumscripsit Vir Doctissimus, R. mus P. Fr. Petrus Martyr de Buenacasa, Clarissimi Ordinis Prædicatorum, Sacræ Theologiæ Magister de numero, ut vocant, Nunciaturæ Hispaniæ Theologus, & Examinator Apostolicus, Regis Catholici Caroli II. Concionator, insuper & Archiepiscopatus Cæsareugustani Examinator Synodalis: *Doctrina hujus illuminata Magistra*, ait, *est utilis, celsa,*

sa, profunda, irreprehensibilis, solida, subtilissima, invulnerabilis, fidelibus Lumen, & Columen, altissima, inimitabilis, suavissima, & propè Divina. Eòdem recidunt, nec sub-
 jicere piget, Verba Viri Doctissimi, ac devo-
 tissimi P. Fr. Raymundi *Lumbier*, Sacratissimæ
 Matris de Monte *Carmelo* Nobilis Alumni,
 qui in Epistola dedicatoria, præmissa tracta-
 tui suo de *Essentia, & Attributis*, sequens
 de Opere *Mystica Civitatis Dei* protulit judi-
 cium: *Opus sanè undecunque mirabile, omni ex*
parte perfectum, & ausim dicere Miraculosum,
& post Sacra Scriptura Dignitatem inter preci-
pua numerandum, & speramus decernendum.

Quæ sanè Doctrinæ commendatio, à tan-
 tis Viris prolata, & quidem ex cognitione
 certissima causæ, quanti facienda sit, nemo
 non videt. Agnovere, proculdubio, Viri doctis-
 simi, piissimique Aureum Angelici Præcep-
 toris Sigillum Operibus istis appensum, de
 quo tamen Articulo sequenti sermo iterum in
 specie redibit. Nil proinde nobis agendum
 restare videtur, nisi ut tot Virorum Illustrium
 vestigia repetentes, sensum nostrum in me-
 dium proferamus, eadem qua hætenus de
 cæteris Doctoribus proferre licuit, Scholasti-
 ca methodo, ac libertate. Sit itaque

ASSERTUM SEXTUM,
*Librorum Mysticæ Civitatis Dei
 Doctrinam propugnat
 universam.*

TOTO rigore *Scholastico* defendimus, pariter & *Positivo*, omnes, & singulas Propositiones contentas in octo Libris MYSTICÆ CIVITATIS DEI, Acta Vitæ Sacratissimæ Deiparæ adumbrantibus; siue pertineant ad *Philosophiam*, aliasque Scientias, seu Facultates *naturales*, siue ad Sacram Theologiam, *Speculativam*, *Expositivam*, *Polemicam*, *Moralem*, *Afcticam*, seu *Mysticam*. In hisce Libris nullus continetur error contra Fidem, vel bonos mores, nulla doctrina nova, vel peregrina, atque à communi sensu Ecclesiæ, & consuetudine aliena; subindeque nulla Propositio, quæ ulli censuræ Theologicæ sit obnoxia. *Afferimus* itaque, Venerabilem Scriptricem in omnibus, & singulis veritatem esse assecutam, absque ulla prorsus falsitate, aut errore *cujuscumque generis*: absque Anilologio, aut inconsequentia. Insuper *affirmamus*, ac *defendimus*, in Libris MYSTICÆ CIVITATIS DEI nullam contineri Propositionem, Dignitati ob-
 jecti revelati derogantem.

ARTICULUS VII.

De cohærentia, & uniformitate
Doctrinæ MYSTICÆ CIVITA-
TIS DEI, ad Sacras Scripturas, ac
Traditiones Ecclesiæ; ad sensa Con-
ciliorum, ac Sanctorum Patrum; ad
alias Revelationes privatas in Ec-
clesia receptas; ad selectiores Doc-
torum Scholæ Sententias, *præci-
puè* autem, ac *specialissimè* ad
Dogmata Angelici Doctoris
DIVI THOMÆ
AQUINATIS.

QUANDOQUIDEM in proximè præce-
dentis Articuli Asserto, ea, quæ sentio
potissima de qualitate doctrinæ MYSTICÆ CIVITATIS DEI, edixerim;
mirabitur fortasse non nemo, BEATISSIME
PATER,

PATER, quid causæ inducat nunc, eâdem de Re iterum repetere sermonem? Etenim si in Libris istis nullus continetur contra Fidem error; si nihil contra bonos mores; si nulla Doctrina nova, vel peregrina, atque â communi sensu Ecclesiæ, & consuetudine aliena; cohærentia ista profectò, uniformitasque, nunc versanda, consequatur necesse est. Cura proinde supervacanea videtur impendi, in Articuli hujus institutione. Verùm pace sic sentientium, ita non est. De re agitur planè gravissima, & quantumvis amplius esse videatur præcedentis Articuli Scopus; novum hunc institui-
mus, nè veluti transcurso quodam *Mysticam Dei Civitatem* præstringere videamur, qua majus opus, & excellentius, in genere suo, â sæculo non est auditum, neque unquam, post Sacræ Scripturæ Volumina, in subsidium Militantis Ecclesiæ, ac solatium, in hac Valle lacrymarum accurrit.

Maluit Magnus Parens Augustinus, Eum ut reprehenderent Grammatici, quàm ut non intelligerent Populi; Malim & Ego tanto fretus exemplo, ac Patrono, me ut reprehendant Critici; quàm ut ista prætermittam. Non equidem propter Viros Theologos de novo operamur, hunc superaddendo Articulum; sed
alio-

aliorum consulimus imbecillitati, horum ut Operum Objecti Majestatem, Amplitudinem, ac Dignitatem, qua major sub Deo nequit intelligi, acie firmiore, utcunque intueri valeant. Eorum igitur operæ pretium erit, ista aliquantulum explicatiora videre, & amplius expensa.

Hujus ergo Divinæ Historiæ Subjectum *attributionis*, ut vocant, est Alma Dei Genitrix Virgo; quæ post Christum, in toto ordine gratiæ, & Gloriæ primatum tenet; cum Eodem ubique, & in omnibus connectitur, cum Novo nempe Adamo, Eva nova, Mater viventium, immo & Vitæ. Hic itaque Scopus est Operis *Mysticæ Civitatis Dei*; ubi octo Libris, principaliora, omnia potius dixerem, Fidei Myſteria, systematicè evolvuntur, & explicantur, latè, dilucidè, simpliciter, solidissimè, & orthodoxè. Prima narratur Ecclesiæ Catholicæ conditio, erectio, & amplificatio: Quo quid esse potest augustius, ac magnificentius? Legatur Lib. 1. cap. 9. nn. 115. 116. 117. at legatur ubique: nam ubique sibi constat. Immaculatissima traduntur morum Præcepta; plurima Sacræ Scripturæ Loca appositè ad subjectum explicantur: Evangelicæ Historiæ rationes subducuntur bene difficiles: insuper &

exiguntur satis implexæ temporum computa-
tiones. Tot porro, ac tantarum occasione re-
rum, subtilissimè enodat, & altissimè, varios
omnigenæ Sacræ Theologiæ, prout res postu-
lant, Articulos, *Speculative, Polemica, Expo-*
sitive, Moralis, Suasoria, ac Mystica.

Ego sanè pluries legi Opus istud, ac toties
mecummetipso tacitus consideravi. Legi, in-
quam, non raptim, non oscitanter, & ignavi-
ter, sed, ut res expostulat, ni multum fallor,
cura ingenti, ac diligentissimo studio, per sin-
gula incisa, ac de verbo ad verbum. Vigiliis re-
petivi, ac protraxi; noctesque complures pro-
duxi insomnes; cuncta, etiam aliàs discussa, re-
vocans ad examinis districtissimi regulas. Sacra-
rum Scripturarum obivi volumina. Sacros Ex-
positores consului. Conciliorum Decreta, ac
Sanctorum Patrum Sententias inspexi. Sum-
mos Ecclesiæ Doctores, etiam Mysticos, *D.*
Thomam, D. Bonaventuram, Alexandrum
Halensem, Scotum, Eximium D. Suarez, alios-
que non paucos præ oculis habui. Revelatio-
nes *SS. Brigittæ, Hildegardis, Mariæ Magdale-*
na de Pazzis, Gertrudis, Angeli Fulginatis, ac
D. Theresiæ Seraphicæ Doctricis adivi. Objectio-
nes omnes, tum Parisienses illas, adeò decanta-
tas, aliasque nonnullas discussi. Defensoria
dein-

deinde contuli, ac Responsiones. Et Hæc quidem est ratio critices à nobis super Opera MYSTICÆ CIVITATIS DEI institutæ; nam præterquamquod cautum me reddiderat quorundam Criticorum nimis præpora temeritas, & audacia; probè cognovi de re agi gravissima, ac proinde pariter esse periculi sententiam pro Operibus istis, aut contra præcipitare.

Ad hæc præterea urgebat ea, quam palàm profiteor, quamquæ semper, & ubique terrarum profitebor, observantia singularis in doctrinam Cœlestem, Angelicamque D. THOMÆ; cui in plurimis contrariari Sententiis Scriptricem hanc Venerabilem nonnulli prodiderunt. Vellem scire, quàm versati fuerint in Angelici Doctoris Operibus, qui talia locuti sunt. Num Operibus Opera, Sententiisque Sententias contrulere? Non enim verò: si enim contulissent, longè aliter censuissent. Quàm ergo immeritò invidiam MYSTICÆ CIVITATI DEI ex hoc capite paraverint, ac Scriptrici Angelicæ, inde vel maximè liquet, quod neminem è clarioribus Scholæ Thomisticæ Aseclis hætenus viderim, qui id dixerit; tantum abest ut affirmaverit, aut asseruerit. An non Thomista rigidus, terribilis pro MYSTICA CIVITATE DEI Defensor, Propugnator, & Apologista, doctif-

P

simus

simus Pater Cabero? Non Thomistæ, bini Carmelitæ doctissimi, Lumbier, & Castilla? Non Thomista Illustrissimus Dominus de Leyba? Rigidi Thomistæ omnes. Thomistæ insuper, & quidem Ordinis primi, & primæ classis, Apostolicus Vir Joannes à Sancto Thoma, qui Venerabilem Scriptricem doctam cœlitus, ac scientia infusa præditam agnovit; ac publicè protestatus est, se paratum esse, idipsum quovis Theologorum Congressu asserere, & propugnare.

Reverendissimus Pater Fr. Petrus Martyr de Buenacasa articulo superiore laudatus, etiam Thomista fuit, quemadmodum, & Sanctissimus P. N. Benedictus XIII. Thomista insuper, & ex eodem Clarissimo Ordine Prædicatorum, Reverendissimus Pater Magister Fr. Joannes Delgado, Sanctæ Inquisitionis Consultor, & Censor, qui jussu Sanctæ, ac Supremæ Inquisitionis Hispanæ, ita de scriptis, ac de Theodidacta Scriptrice censuit, ut nemo alius, nè quidem ex nostris. Nam præterquamquod extra se raptus Divino quodam impetu, seu entusiasmo, magnis affectibus ubique assurgens, plenissimo corde, ac flammato, illapso cœlitus igne, Venerabilem Scriptricem laudibus summis onerare non veretur, ab eximia sanctitate, à
scien-

scientia cœlitùs infusa, à speciali Deiparæ magisterio clarè cognito, insuper & ab aliis charismatibus; judicium protulit de Opere ipso, & qualitate doctrinæ, adeò amplum, ut ampliùs profectò de ipsius Angelici Præceptoris Operibus, ac doctrina proferre non valuisset. Nec id mirum esse debet: inde enim doctrinam MYSTICÆ CIVITATIS DEI, ab ipso Deo paratam, à Deipara traditam, de Cœlo, inquam, descendisse agnovit, unde doctrinam suam traxisse probatur Doctor Ipse Angelicus, qui quidem absque scientia infusa, tot, tanta, ac talia, quæ scripsit, numquàm ita scripsisset. Dicta autem clarissimi ejus Dominicani videantur, quæso, apud Ven. Capuccinum P. Fr. Paulum de Ezija in *Muro suo inexpugnabili*, cap. 9. Fund. 9. n. 82. & cap. 11. Fund. 11. n. 181.

Audeo ergo, & affirmo: neminem verè Thomistam, doctrinæ Librorum MYSTICÆ CIVITATIS DEI invidiam ire suscitaturum. Verum autem voco Thomistam, quemvis in Operibus Angelici Doctoris mei, bene versatum; cujusmodi plurimos, innumerosque reperire est Sapientissimos Viros, Eximiosque Theologos Clarissimi Ordinis Prædicatorum, qui nocturna manu versant, ac diurna, Opera tanti Doctoris: tales etiam voco ejusdem amplissimæ

Scholæ ex aliis Ordinibus Affeclas omnes, five Sæculares illi sint, five Regulares; quorum omnium numerus succrevit, & in dies succrescit, ut æquare gestiant multitudinem Stellarum. Quæ cum ita sint, nequeo profectò non mirari, quî invalescere potuerit rumor iste vulgaris, vel potius error, futilis omnino, ac finè ratione. Nam ut Angelici Doctoris stylus brevis, grata facundia, celsa, clara, firma sententia, immo firmissima; ita & per omnia, *Mystica Civitatis Dei* stylus, facundia, sententia. Verùm dixerit aliquis: quorsum ista tanta? Num propterea causa cecidisse dicenda foret Opus *Mystica Civitatis*, quòd à D. Thomæ Placitis deflectere probaretur? Æstimet, quæso, qui ita quæsiverit, tanti Doctoris Authoritatem, Dignitatem æstimet celsissimam, ac de Ecclesia Dei tota, ingentissima promerita, & præclara; æstimet qualitatem doctrinæ. Suspiciet profectò in Angelico Doctore, Doctorem Ecclesiæ Communiem, Augustinum contractum, Dilucidissimum Sacrarum Scripturarum, omnium Sanctorum Patrum, ac Philosophorum Compendium, atque in omni fermè disciplinarum genere instructissimum.

Unde quæsito isti prorsus inutili, quoniam de subjecto planè non supponente, facili nego-

tio respondemus: Caderet enim causa Opus
Mystica Civitatis Dei, si Doctore contraheret An-
 gelico. Verum conditio ista, quæram & ego, quid
 ponit *in esse*? Nil planè. Ego pro veritate decerto,
 procul omni partium favore, aut factione. Sacra-
 rum Oracula Scripturarum, Ecclesiarum Con-
 sensum, OEcumenicorum Decreta Concilio-
 rum, Sanctorum Patrum Sensum, Doctores
 Ecclesiæ, ac Scholæ, ordine quemque suo, ac
 Dignitate, amplector. Ipsius Ecclesiæ Dei Vivi,
 quæ Firmamentum est, & Columna Veritatis,
 infallibilitatem cernuus adoro. Romani Ponti-
 ficis non solum Primatum, sed & è Cathedra
 definientis infallibilem agnosco Sententiam, at-
 que irreformabilem. Hæc loca nostra Theolo-
 gica sunt, ad quæ, tanquam ad Lapidem Ly-
 di, Opus *Mystica Civitatis Dei*, semel & ite-
 rum contulimus, eo districti examinis rigore,
 quo censuissem, si à quavis alia, de turba fide-
 li, foemina, fuisset elaboratum. Testor proin-
 de Deum Omnipotentem, qui corda scruta-
 tur, & renes, hæc omnia esse peracta, ea ani-
 mi præparatione, ut Opera ista de *Mystica*
Civitate, quantumvis pia sint, & animæ meæ
 jucunda, & charissima, ultricibus flammis ala-
 critè donarem, si quidquam in eis occurrisset,
 Verbo Dei scripto, vel tradito dissonum, aut
 sen-

sensui Universalis Ecclesiæ, immaculatique morum regulis adversum.

Verum tantum abest, ut quidquam tale occurrat in Opere toto, quod inter Immenſa Divinæ Pietatis beneficia, quibus Dominus Miſericors, & Clemens, Eccleſiam ſuam in hac lacrymarum Valle militantem amplificare in dies, & lætificare, meritis dilectiſſimæ Matris ſuæ, ſemper Immaculatæ, precibusque, non ceſſat; hoc cenſeam eſſe temporibus iſtis præcipuum, voluiſſe nempe, tot, tamque ineffabilia Myſteria ejusdem ſuaviſſimæ Genitricis ſuæ, quæ in Sacra Pagina plerumque enigmaticè, ſacroque velamine obducta teguntur, ita in Opere iſto propè Divino, reſerata tradere, evoluta, & explicata, ut non immeritò Viri doctiſſimi, prudentiſſimique affirmare auſint, eſſe de novo revelata. Et ſingula proſectò, quæ de Glorioſa Virgine Deipara traduntur à Patribus ſparſa paſſim in Scriptis ſuis, malè ſibi cohærerent, ſi quæ de Eadem Matre Puriſſima in *Mystica Civitate* ſyſtematicè exponuntur, in quoquam à Fide deflecterent orthodoxa.

An non ſingula iſtorum, cùm occurrunt in Sanctis Patribus, in Sacris Expoſitoribus, in Doctoribus Scholaſticis, & Aſceticis, pias illico Fidelium mentes accendi, rapi, & in aſſenſum

cogi videmus? Quid causæ est ergo, quòd ita in unum collecta Systema, ita ordinatissimè disposita, sic dilucidè explicata, sic Vitæ Sacratissimæ Matris à primo Immaculatæ Conceptionis sui instante, ad ultimum, quo in Cœlum assumpta, atque in æternum regnatura coronata est, accommodatissima perspiciuntur, quorumdam nihilominus infirmorum oculos hominum percellunt? Propterea nimirum, mea sententia, quòd radios adeò immensi splendoris non nisi refractos sustinere valet eorundem infirmitas; ideò miseri Myopes isti impingunt in meridie, acies eorum lurida caligat in conspectu splendidissimi Solis, & succumbit; quæque sparsa non vertuntur in dubium nisi à filiis Belial, in unum coacta, & amplissimè ordinata, ac disposita, perferre non sustinent.

Sed cogitent isti Disputatores, ait suavissimus Deiparæ Mystes S. Ildephonsus Toletanus, *naturarum Leges, cogitent, & Divinarum rerum virtutem; quia non ex natura rerum Divinæ Leges pendent, sed ex Divinis Legibus natura rerum, & Leges manare probantur.* Ergo naturarum Leges, rerumque Divinarum virtutem æstimare discant. Profectò naturarum Leges quod attinet, dictum Plinii verissimum esse Physici omnes agnoscunt: (*) *Natura re-*

(*) Lib. 7. cap. 1.

rum vis, atque majestas, ait, in omnibus momentis fide caret. Divinarum verò rerum quod attinet virtutem, hanc ubique, & semper infabilem esse, Theologi fatentur universi. Quis autem conclusit ostiis Mare Immensum Gratiæ, & Gloriæ Sanctissimæ Deiparæ? Quenam obsecro pulchritudo, quærit inflammatus, & accensus, Sanctus Thomas à Villa-nova, quanam Virtus? Quenam Gratia? Quæ Gloria Matri Domini non congruit? Solve cogitationibus habenas, dilata intellectui fimbrias..... Quantum potes, tantum auge, quantum vales, tantum adde: Major est ista Virgo, superior est Virgo ista.

Hæc profectò doctrina, hujus Seraphici Antistitis non est, etsi alioqui sua: eam enim traditam accepit à Magno Papa Gregorio: (*) *Mons quippe fuit Beata Virgo, quæ (expendat Theologus, tacitus audiat ille Lampridius) omnem Electæ Creaturæ altitudinem, Electionis suæ Dignitate transcendit. Et copiosius adhuc D. Chrysostomus apud Metaphrasten, iisdemque fermè sententiis; quas Theologus pariter expendat, & iterum tacens, audiat attentè mali ominis Lampridius: Quid Matre Domini Sanctius? Non Propheta, non Apostoli, non Martyres, non Patriarcha, non Angeli,*

(*) D. Gregor. in 1. Reg. 1. non

non Throni, non Dominationes, non Seraphim, non Cherubim, non denique aliud quidpiam inter creatas res visibiles, aut invisibiles, majus, aut excellentius inveniri potest. Et ita passim Patres omnes Latini, & Græci, qui quoties de Matre Purissima differunt, acti videntur extra se, & vino inebriati condito, nec modum agnoscere valent, nedum observare.

Verùm nemo calumniari audeat, hæc, & similia, de Dignitate Electionis Gloriosæ Deiparæ, à Patribus per auxesin, & hyperbolicè, esse prolata. Theologi Scholastici, qui omnia discutiunt, ac rimantur, dicta Patrum incunctanter adoptant, & amplectuntur, & quidem in proprio, plano, obvioque verborum sensu. *Dicitur plena gratia* (ait (*) de B. Virgine Angelicus Doctor) *per comparisonem ad ipsam, quia, scilicet, habebat gratiam sufficientem ad statum illum, ad quem erat electa à Deo, ut esset, scilicet, Mater Unigeniti ejus.* Hæc, stylo brevi, & grata facundia, est Celsa, Clara, Firma, ac Turgentissima Angelici Præceptoris Sententia; quam tamen parvulorum captui dentibus Seraphicis atterat Seraphicus Doctor. (*)

Immensa certè fuit gratia, qua Ipsa fuit plena: immensum enim Vas non potest esse ple-

(*) D. Thom. 3. p. q. 7. art. 10. ad 1. Q (*) S. Bonav. in Specul. lec. 5. ^{num,}

num, nisi immensum sit istud, quo est plenum. *MARIA* autem Vas Immensissimum fuit, ex quo illum, qui Cælo major est, continere potuit. Quis est Cælo major? Certè Ille, de quo *Salomon* ait: Si Coelum, & Cæli Cælorum Te capere non possunt, quantò magis Domus hæc, quam ædificavi? Non utique Domus per *Salomonem* ædificata, sed Domus per illam significata, Illum capere potuit. Tu ergo, Immensissima *MARIA*, capacior es Cælo, quia quem Cæli capere non poterant tuo gremio contulisti. Tu capacior es Mundo, quia quem totus non capit Orbis, in Tua se clausit Viscera factus Homo. Si ergo *MARIA* tam capacissima fuit Ventre, quanto magis Mente? Et si capacitas tam immensa fuit gratia plena, oportuit utique, quòd gratia illa, quæ tantam implevisse potuit capacitatem, esset immensa. Hanc in *Deipara* gratiæ Plenitudinem, nec præterea quidquam, explicat in Libris suis Venerab. Sanctimonialis *AGREDENSIS*; de quibus, Adjutore Deo, parati sumus propugnare in quovis Theologorum Congressu tenoris sequentis Assertum.

Sit itaque

ASSERTUM SEPTIMUM,

Authoritatem Extrinsecam

Doctrinæ Librorum Myf-

ticæ Civitatis Dei *am-*

plius affirmat.

IN Articuli præcedentis Asserto, ex æquo comprehendimus ab Authoritate *Intrinseca*, & *Extrinseca*, totam MYSTICÆ CIVITATIS DEI Doctrinam. In præfenti autem præcipuè insistimus Authoritati *Extrinseca*, ad omnem coercendam invidiam. Hoc autem Assertum sub triplici capite, seu membro proponimus. Primò *asserimus*: in octo Libris MYSTICÆ CIVITATIS DEI nullam contineri Propositionem, quæ non sit summè consona Sacræ Scripturæ, ac Traditionibus, ac Sacrorum Canonum, Æcumenicorumque Decretis Conciliorum, ac SS. Patrum unanimi consensui, aliisque privatis Revelationibus in Ecclesia receptis, ac præcipuorum Scholæ Principum communi sententiæ. *Dicimus* secundò, & *specialiter*: nullam in Opere toto prædicto reperiri Propositionem, quæ vel in minimo contraria sit Doctori An-

gelico D. Thomæ; nullam, quæ Principiis inconcussis
 ejusdem Sanctissimi Doctoris non cohæreat; quæquæ
 Momentis ineluctabilibus ejusdem Clarissimi Aquina-
 natis probari non possit, ac demonstrari. *Dicimus* ter-
 tiò, ad frangendam audaciam, ac temeritatem *Eusebii*
Amort, ejusque similium; & eâdem, qua hactenus, Li-
 bertate Scholastica *asserimus* (absque præjudicio ta-
 men, & salvis juribus Primæ Sedis, atque Ecclesiæ Ca-
 tholicæ sensu) Theologicis innixi Principiis, regu-
 lisque à Theologis tradi solitis in materia *de Fide*, ac
de Revelationibus privatis: Opus prædictum MYS-
 TICÆ CIVITATIS DEI opè humana, aut in-
 dustria confici non potuisse, nec aliter haberi,
 quàm *Divina Revelatione*.

Actenus, BEATISSIME PATER, per-
 duximus hoc tenue Specimen, Sacræ
 ejus Scientiæ depositum adumbrans,
 qua Ecclesia Sancta Dei alitur, viget,
 efflorescit, & propugnatur, Sacræ in-
 quam Scholasticæ Theologiæ. Hæc est nobilis-
 sima illa Scientia secundum *fidelem sermonem*,
 qua Pastores Ecclesiæ efficiuntur potentes ex-
 hortari in doctrina sana, & eos, qui contradicunt
 veritati, arguendo repercutere. Hæc subli-
 mis illa Scientia est, quæ immobili veritatis æter-
 næ fundamento innixa, ex Propositionibus Fidei

Conclufiones fuas, tum circa Deum, tum circa rem quamlibet à Deo revelatam colligit, quibus Fides vera gignitur, nutritur, defenditur, roboratur; ut *possimus comprehendere cum omnibus Sanctis, quæ sit latitudo, & longitudo, & sublimitas, & profundum.* Authoritati igitur potissimum infistimus, *in captivitatem redigentes omnem intellectum in obsequium Fidei*, persuasi, quoniam *accedentem ad Deum oportet credere*: nec humanarum rationum adminicula quærimus, nisi ut præstent Fidei supernaturali famulatum.

Neque nos carpere audeant garuli Regionum Borealium heterodoxi Novatores, Lutérani, Calvinistæ, omnisque pestilentissimæ impietatis colluvies, Sociniani. *Natura namque ordo ita se habet*, ait Magnus Parens Augustinus in lib. de Moribus Ecclesiæ Catholicæ, cap. 2. *Ut, cum aliquid dicimus, rationem præcedat Authoritas*: Et alibi: *Authoritati credere, magnum compendium est, & nullus labor.* Authoritati utique Dei, qui nec fallere potest, nec falli, & Ecclesiæ Catholicæ, quæ firmamentum est, & columna veritatis, nec porta inferi prævalebunt adversus eam. Et profectò ordo ille naturæ, quem notavit Augustinus, adeò conspicuus est, ut eundem factis suis probent ipsi.

ipsumet heterodoxi, etsi dictis improbent: adeò quotidie mentitur eorum iniquitas sibi.

Proximè amplectimur Sanctorum Patrum dicta, ac Sententias, quibus, ordine cuique suo, primas meritò concedimus, post Ecclesiæ Catholicæ, & Apostolicæ Sedis Auctoritatem: *Hæc enim nisi nos commoveret, nec ipsi crederemus Evangelio*, ut loquitur proximè laudatus Magnus Parens Augustinus, contra Epistolam Fundamenti, cap. 5. Eorum præterea Summorum Doctorum recipimus Auctoritatem, qui jure optimo in Scholasticis Aulis primatum obtinent; præcipuè autem quatuor illorum Sacræ Theologiæ Scholasticæ Principum, Alexandri Halensis, D. Thomæ, D. Bonaventuræ, Subtilisque Doctoris Scoti, quorum Opera, Resolutiones, ac Momenta, in hoc Specimine leviter adumbrata, propugnanda nobis adoptavimus, ac defendenda.

Et sanè hos quatuor cæteris omnibus meritò præferimus, quibus cæteri omnes Scholastici à diebus illorum usque in præsens, obstricti sunt. Ipsi enim æstum Sacræ hujus Facultatis sibi invicem reciprocantes hinc & inde, in cæteros omnes derivare non cessant: quorum adeò probata est in Ecclesia Dei scriptorum copia, soliditas, ordo, subtilitas, ac sapien-

piencia, ut sequiores Theologi omnes nullam in Schola tota sententiam approbent, quam ab aliquo ex quatuor istis esse traditam, aut subillatam saltem, non prætendant. Philosophiam autem sæcularem Sacræ Theologiæ administram, pedisequam, Ancillam, amplexi sumus in hoc Specimine, more Patrum, ac Majorum, caventium juxta præceptum Apost. ad Collos. 2. 8. *Nè quis Fideles decipiat per Philosophiam, & inanem fallaciam.* Unde nulla est sententia, aut conclusio, quæ de mente Alexandri Halensis, D. Thomæ, D. Bonaventuræ, aut Scoti defendi queat, quam ultrò defendere non promittimus; tantumdem etiã spondentes pro Opere illo mirifico, ac planè divino Mysticæ Civitatis Dei.

Sanè jampridem, & ex cognitione plenissima Causæ, aliorum tamen fretus exemplo, animo conceperam Concordiam instituerè, seu Conciliationem, ut vocant, D. Subtilem Scotum inter, Angelicumque Præcept. D. Thomam. *Ego verò*, ait Eminentissimus Sarnanus, *qui probè novi illos Viros ingenii solertia præstantes, uno eodemque spiritu actos, ad ea scribenda esse aggressos, quæ eundem spectarent finem, quæque Dei Ecclesiæ plurimum conducere; pugnantiã, nec sensisse, nec voluisse*

*luisse illos omnino mihi persuasi; eorumque suscep-
 cepi refutandum errorem, qui, cum verbis,
 tum rebus, illos dissensisse affirmare ausi sunt,
 atque adeò audent Id verò ad Christianam
 Religionis pietatem plurimum interesse arbitror,
 cum homines non medicriter offendantur, dum
 Eos ipsos, Scholastica Theologia Magistros, in-
 ter se concertare audiunt, quasi eorum Doctrina,
 non ab eo Spiritu, qui Catholicam Ecclesiam gu-
 bernat, profecta sit.*

Viderat profectò bene Eminentissimus
 Sarnanus: quàmvis non proinde omnia perege-
 rit, nec peracta æquabiliter perfecerit, sed le-
 viter, ac satis perfunctoriè. Nec alium sibi
 proposuit conciliandi ordinem, quàm, ut in Li-
 bris Sententiarum, amborum Doctorum Pla-
 cita conciliaret. At certè, vel sic, sat magna
 præstitit, qui plurimorum hac in parte prior
 detexit errorem; dum eam Conciliationem Vi-
 ro Theologo assequibilem judicavit. Nos ita-
 que clarissimi Viri conatibus applaudentes, ea,
 quæ deesse videntur, planè non pauca, Deo O.
 M. aspirante, facili negotio supplebimus, & qui-
 dem absolute, & ubique tam in Philosophicis,
 quàm in Theologicis. Hinc, ut spero, fiet, ut
 in posterum utriusque clarissimi Doctoris Asse-
 clæ neutrius Authoritatem parvipendant, quos
 in

in nullo inter sese discrepare compererint. Patrem etiam Concordiam in omnibus ostendere promittimus, Sententiarum Mysticæ Civitatis Dei cum Doctrina D. Thomæ.


Hæc autem laboris nostri conamina, PATER BEATISSIME, Theologis haud ingrata fore judicamus; eò vel maximè, quòd hanc Concordiam minimè nobis effingimus, sed insitam in ipsis utriusque Doctoris Textibus indigitamus. Et sanè juxta Doct. Subt. *Omnis pluralitas ad tantam unitatē reducitur, ad quantam reduci potest.* Sic in Divinis, Personarum pluralitas unus Deus est; naturarum pluralitas in Domino JESU, unus est Christus; credendorum pluralitas, una Fides; pluralitas salutaris regenerationis ex Aqua, & Spiritu Sancto, unum Baptisma; pluralitas omnium Fidelium, unum Ovile; Pastorum denique pluralitas, in unum sub
TE unico Archi-Pastore
coalescit.

*Regi sæculorum Immortali, &
Invisibili soli Deo honor,
& gloria in sæcula
sæculorum.*

AMEN.

ERRATA CORRECTA.

Pagina 12. lin. 9. in ædibus, *lege* ex ædibus. Eadem pag. lin. 11. 12. THOMAS HIBERNICUS Ordinis Prædicatorum, *lege* Petrus de Hibernia Ordinis Sancti Benedicti.
 Pag. 16. lin. 2. XVII. Januarii, *lege* XVI. Januarii.
 Pag. 25. lin. 4. delaudat, *lege* dilaudat.
 Pag. 55. lin. 2. Decefforis, *lege* Deceffores.
 Pag. 82. lin. ultim. additissima, *lege* abditissima.
 Pag. 91. lin. 21. flutum, *lege* stultum. Pag. 106. lin. ultim. ait, *lege* ait in Approbatione Certaminis Parisiensis.
 Pag. 111. lin. 16. dixerem, *lege* dixerim.
 Pag. 113. lin. 5. præpora, *lege* præpropera.
 Pag. 117. lin. 16. ad Lapidem Lydi, *lege* ad Lapidem Lydium.
 Pag. 125. lin. 19. dicimus, *lege* discimus. Eadem pag. lin. 14. Lutherani, *lege* Lutherani.



AUTHORIS MONITIO AD LECTOREM.

Absoluta hujus Opusculi de *Specimine Sacre Panopliæ* editione, primum innotuit verum, indubitatumque Authorem Libelli de *Superstitione vitanda*, esse D. Ludovicum Antonium Muratorium, Serenissimi Ducis Mutinensis Bibliothecarium. Is est, qui plura egregia Volumina de *Rebus Italicis* elucidavit; quæ quidem, tametsi Virum non adstruant Theologum, Virum tamen ostendunt satis solertem, industrium, eruditum. Ego Eum sub sua ista Larva *Lampridii*, turbas inter Theologos contra Sanctiones Canonicas excientem, deprehendi; pluribusque satis acribus proscidi maledictis; quibus profecto abstinuisssem, si verum ornatissimi Viri nomen, ac Ingentia de Republica Literaria promerita citius agnovisssem. Utinam in gradu suo stetisset, docilisq; Candido Parthenotimo, e partibus veræ, solidæque Pietatis dimicanti, concessisset. Quid tibi, Vir ornatissime, cum Voto Sicularum Sanguinario? Ecquis est inter Theologos, qui Votum istud ad amussim veræ Religionis, ac Pietatis Orthodoxæ interpretari non possit, & approbare? Verum de hac Controversia fusiùs alibi dicitur, Deo dante. Interim, vero Authoris nomine detecto, pacem expetimus, veniamque Viri Clarissimi. Probra in ipsum nimis ardentem prolata rescindimus, ac maledicta revocamus; nil tamen de Censura Libelli de *Superstitione vitanda*, immutare, aut remittere volentes. Agnitum ergo Authorem amplissimum cernui suspicimus; Libellum autem, maturè discussum, anathemate dignum judicamus; idque, D. O. M. favente, ubicumque terrarum probare, evincere, demonstrare parati sumus.

Fr. Lucas Ramirez,